

# An Exposition of the Seven Church Ages

## Chapter One

### Emoniseli ya Yesu Klisto

#### **Emoniseli Ya Yesu Klisto (Emoniseli 1: 1-20)**

Emoniseli ya Yesu Klisto, oyo Nzambe apesaki ye mpo na kolakisa na basali na Ye makambo maye masengeli kosalema kala mingi te; mpe Atindaki mwanje na ye mpo na komonisa yango epai na mosali na Ye Yoane.

Ye asakolaki Liloba na Nzambe mpe litatoli ya Yesu Klisto, mpe makambo nyonso oyo amonaki.

Esengo na moto oyo azali kotanga, mpe na baye bazali koyoka maloba ya lisakoli oyo, mpe baoyo bazali kobatela makambo maye makomami kati na yango : mpamba te ntango ekómi pene.

Yoane, epai na Mangomba nsambo oyo ezali na Azia : Tika ete ngolu mpe kimia epesamela bino, kowuta na Ye oyo azali, azalaki mpe azali koya; mpe kowuta na Milimo sambo oyo bazali liboso na kiti na Ye ya bokonzi;

Mpe kowuta na Yesu Klisto, Motatoli ya Sembo, mpe Mobotami ya Liboso kati na bakufi, mpe Mokonzi ya bakonzi ya mokili. Epai na Ye oyo alingaka biso mpe asukoli biso na masumu na biso na nzela ya makila na Ye,

Ye oyo akomisi biso ekolo ya bakonzi mpe ya banganzambe mpo na Nzambe, Tata na Ye; Tika ete nkembo mpe nguyaya ezonga epai na Ye mpo na libela na libela! Amen!

Botala, azali koya na mapata. Mpe liso nyonso ekomona Ye, ezala bato oyo batobolaki Ye; mpe bikolo nyonso ya mokili ekomilela-lela na ntina na Ye. Ekosalema bongo! Amen.

Nazali Alifa mpe Omega, Ebandeli mpe Nsuka, elobi Nkolo Nzambe, Ye oyo azali, azalaki mpe azali koya, Mozwi-Na-Nguyaya-Nyonso.

Ngai Yoane, Ndeko na bino, oyo azali kokabola elongo na bino mpasi, bokonzi mpe motema molai kati na Yesu Klisto, nazalaki kati na esanga na Patamo, na ntina na Liloba na Nzambe mpe na litatoli ya Yesu Klisto.

Namemamaki na Molimo na mokolo na Nkolo, bongo nayokaki nsima na ngai mongongo makasi lokola kelelo,

koloba : Nazali Alifa mpe Omega, Moto ya Liboso mpe ya Nsuka. Makambo oyo ozali komona, koma yango na buku mpe tinda yango na Mangomba sambo oyo ezali na Azia : na Efese, mpe na Sumuluna, mpe na Pelegamo, mpe na Tyatira, mpe na Saladi, mpe na Filadelefia, mpe na Laodikia.

Nabalukaki mpo na komona mongongo oyo elobaki na ngai. Mpe wana nabalukaki, namonaki bitelemiselo ya wolo nsambo ya mwinda;

Mpe katikati na bitelemiselo-ya miinda nsambo, ezalaki na moto moko lokola Mwana na Moto, alataki elamba molayi mpe mokaba moko ya wolo zingazinga na ntolo na Ye.

Motó mpe Nsuki na Ye ezalaki mpembe lokola léne, mpembe makasi lokola matandala; mpe miso na Ye ezalaki lokola móto oyo ezali kopela makasi";

Mpe makolo na Ye ezalaki lokola motako oyo euti kobimisama na litumbu na móto; mpe mongongo na Ye lokola lokito ya mai monene.

Mpe na loboko na Ye ya mobali Asimbaki minzoto nsambo; mpe uta na monoko na Ye, mopanga mopeli na ngambo mibale ezalaki kobima. Mpe elongi na Ye ezalaki lokola moyi, na ntango engalaka na makasi na yango nyonso.

Mpe ntango namonaki Ye, nakweyaki na makolo na Ye lokola moto oyo akufi. Bongo Atiaki loboko na Ye ya mobali likolo na ngai mpe Alobaki na ngai ete : Kobanga te! Nazali moto ya Liboso mpe ya Nsuka:

Nazali Ye oyo azali bomoi, Nakufaki; mpe tala, Nazali na bomoi libela na libela, Amen; mpe Nazali na bafungola ya kufa mpe ya mboka ya bakufi.

Yango wana komá makambo oyo omoni, makambo oyo ezali kosalema, mpe makambo oyo ekoya na nsima;

Libombami ya minzoto nsambo oyo omonaki na loboko na Ngai ya mobali, mpe bitelemiselo-ya-miinda

nsambo ya wolo. Minzoto nsambo ezali banje nsambo ya mangomba nsambo; mpe bitelemiselo-ya-miinda nsambo oyo omonaki ezali mangomba nsambo.

### **Maloba Ya Ebandeli Ya Mokapo Ya Liboso**

Emoniseli 1:1-3.

“Emoniseli ya Yesu Klisto, oyo Nzambe apesaki Ye, mpo na kotalisa na basali na Ye makambo maye masengeli kosalema kala mingi te; mpe Atindaki mwanje na Ye mpo na komonisa yango epai na mosali na Ye Yoane;

Ye asakolaki Liloba na Nzambe mpe litatoli ya Yesu Klisto, mpe na makambo nyonso oyo amonaki.

Esengo na moto oyo azali kotanga, mpe na baye bazali koyoka maloba ya lisakoli oyo, mpe baoyo bazali kobatela makambo maye makomami kati na yango : mpamba tentango ekómi pene.oyo ekomami na kati: Mpamba te ntango ekómi pene. ”

Mokomeli ( kasi nkolo te) ya buku oyo ezali Santu Yoane. Bakundoli ya mambi ma kala bandimi ete ye abikaki eteni ya suka ya bomoi na ye na Efese, atako na ntango ya bokomami ya buku oyo, ye azalaki na esanga ya Patamo. Ezali lisolo ya bomoi ya Yoane te, kasi ezali Emoniseli ya Yesu Klisto kati na bileko oyo ekoya sima ya lingomba. Na molongo na yango ya misato, ebengami esakweli, mpe ezali mpenza yango.

Buku oyo ebéngamaka bo momesano Emoniseli Ya Santu Yoane, kasi ezali libunga. Ezali Emoniseli ya Yesu Klisto oyo epesamaki epai na Yoane mpo na Baklisto ya bileko nyonso. Ezali buku bobele moko kati na Biblia mobimba oyo ekomami na Yesu Ye moko, na nzela na komonisama na Ye epai na mokomeli moko

Ezali buku ya suka ya Biblia, nzokande yango ezali kosakola ebandeli mpe suka ya bileko ya Nsango Malamu.

Sikawa, na lokóta ya Greki liloba oyo emoniseli ezali “apokalipisi”, oyo elingi koloba “komonisama”. Komonisama yango etalisami malamumu mpenza na ndakisa ya moyemi bikeko oyo azali kozipola mosala na ye oyo ayemi, komonisáká yango polele na miso na bato. Ezali kolongola ezipeli, komonisáká na bongo polele eloko oyo ebombamaki. Boye, komonisama yango ezali bobele emoniseli ya Klisto te, kasi ezali **EMONISELI YA MISALA NA YE YA MIKOLO MIKOYA KATI NA BILEKO NSAMBO YA LINGOMBA OYO EZALAKI KOYA.**

Tokoki ata moke te kolobela na kolekisa ndelo na ntina na motuya, mpo na mondimi ya solo, ya emoniseli na nzela ya Molimo. Emoniseli ezali na motuya mingi mpo na bino koleka ntango mosusu ndenge bozali kokanisa. Sikawa nazali te koloba na ntina na Búku oyo ya Emoniseli ná bino. Nazali koloba na ntina na emoniseli Nyonso. Ezali mpenza na motuya mingi mpo na lingomba. Boyebi lisusu na Matai 16 esika Yesu atunaki bayekoli, motuna oyo,

“Bato balobaka ete ngai Mwana na moto nazali nani?

Bango bayanolaki : bamosusu balobaka ete Ozali Yoane Mobatisi; bamosusu, Eliya; mpe bamosusu Yelemia, to moko na basakoli.

Alobaki na bango: Kasi bino bolobi ete Ngai nazali nani?

Bongo Simona Petelo ayanolaki mpe alobaki: Yo ozali Klisto, Mwana na Nzambe na bomoi.

Mpe Yesu alobaki na ye ete: opambolami, Simona mwana na Yona; mpamba te mosuni mpe makila emonisi yango epai na yo te, kasi ezali Tata na Ngai oyo Azali na likolo.

Boye Ngai naye bisi yo ete Yo ozali Petelo, mpe likolo na libanga oyo Nakotonga lingomba na Ngai; mpe bikuke ya ewelo ekoki kolonga yango te. ”

Bakatoliko ya Roma balobaka ete lingomba etongami likolo na Petelo. sikawa, wana ezali mpeza komona makambo na ndenge ya mosuni. Ndenge nini Nzambe akoki kotonga lingomba likolo na moto oyo azalaki kotatabana na lolenge ete awanganaki Nkolo Yesu mpe alakaki mabe wana ezalaki ye kosala yango? Nzambe akoki te kotonga lingomba na Ye likolo na moto oyo abotami kati na lisumu. Mpe ezalaki te libanga moko oyo evandaki wana lokola nde Nzambe abulisaki mabele na esika yango. Mpe ezali te lokola ba-Protestant balobaka, ete lingomba etongami likolo na Yesu. Ezalaki **EMONISELI**. Botánga yango ndenge ekomami: “Nzoto ná makila nde **EMONISI** yango te, **KASI TATA NA NGAI NDE AMONISI YANGO**, bongo **LIKOLO YA LIBANGA OYO (EMONISELI) NAKOTONGA LINGOMBA NA NGAI.**” Lingomba etongami likolo na Emmoniseli, likolo na “ Yango Elobi Nkolo”.

Ndenge nini Abele ayebaki eloko asengelaki kosala mpo na kopesa mbeka oyo ebongi epai na Nzambe? Na nzela ya kondima azuaki emoniseli ya makila. Kaina azuaki emoniseli ya bongo te (atako azalaki na mobeko) yango wana akokaki te kopesa mbeka ya malamumu. Ezalaki emoniseli kouta na Nzambe nde esalaki bokeseneni mpe epesaki bomoi ya seko na Abele. Sikawa, okoki kozua eloko mokambi alobi, to

oyo likindo ezali koteya, mpe atako bakoki koteya yo yango na maloba makasi ndenge nini, ntango nyonso Nzambe amonisi yo te ete Yesu azali Klisto, ete makila nde ezali kopetola yo, mpe ete Nzambe azali Mobikisi na yo, okozua ata moke te bomoi na seko. Ezali emoniseli ya Molimo nde ezali kosala yango.

Bongo nalobaki ete Buku oyo ya Emoniseli ezali emoniseli ya Yesu mpe makambo Azali kosala kati na mangomba ya bileko oyo nsambo. Ezali emoniseli mpo ete bayekoli, bango moko, bayebaki te bosolo yango oyo ekomami. Yango emonisamaki liboso te epai na bango. Bomikanisela ete bayaki epai na Yesu na Buku ya Misala mpe batunaki Ye: "Ezali na ntango oyo nde Okozongisela Yisalaele bokonzi?" Bongo Ye Alobaki: "Ezali likambo na bino te ya koyeba bantango to bileko." Mibali yango bazalaki naino kokanisa ete Yesu alingaki kozala na bokonzi ya mokili oyo. Kasi bokonzi oyo Ye alingaki kotonga ezalaki bokonzi ya molimo. Akokaki ata koyebisa bango esika na Ye kati na yango te, mpamba te Tata amonisáki Ye yango te. Kasi sikawa, nsima na liwa mpe lisekwa na Ye, mpe na ntango oyo ya mosala na Ye ya molobeli, Azali na makoki ya kotalisa awa kati na emoniseli oyo ya Ye Moko epai na Yoane, eloko nini Nkembo mpe bozali na Ye ekozala mpe ekosála kati na lingomba.

Kati na emoniseli oyo, Ayebisi biso suka na zabolo. Atalisi lolenge Akosilisa ná Zabolo mpe Akobwaka ye kati na etima ya móto. Amonisi suka ya bato mabe oyo bazali kolanda Satana. Boye Satana ayinaka yango.

Bosílá komona ndenge Satana azali koyina babuku mibale ya Biblia koleka babuku misusu nyonso? Na nzela ya bato na likindo mpe ya baoyo bamibengaka bato na mayele, azali ntango nyonso kobundisa Buku ya Ebandeli ná Buku ya Emoniseli. Kati na babuku mibale oyo tomoni ebandeli ya Satana, banzela na ye ya nsomo mpe kobebisama na ye. Yango nde ntina abundisaka babuku wana. Ayinaka ete átálisama polele, mpe kati na babuku yango, emonisami polele mpenza oyo ye azali. Yesu alobaki na ntina na Satana: "Azali na eteni moko te kati na Ngai mpe Ngai nazali na eteni kati na ye te." Zabolo akolinga kotalisa ete ezali bongo te; kasi akoki te, na bongo azali kosala manso akoki mpo na kobebisa kondima ya bato kati na Liloba. Kasi soki lingomba eboyi kondimela Satana mpe endimi emoniseli ya Liloba na nzela ya Molimo, bikuke ya ewelo ekoki kolonga ye te.

Tika názwa mwa ndakisa moko awa na mosala na ngai moko ya koteya, soki bolingi. Bino nyonso boyebi ete nazali na likabo moko ya kokamwa na bomoi na ngai. Ezali likabo moko oyo na nzela na yango Molimo Mosantu akoki kososola makono, makanisi ya mitema na bato, ná mpe makambo mosusu ya kobombama oyo bobele Nzambe akoki koyeba mpe na sima komonisa yango na ngai. Nakolinga ete bótéléma elongo na ngai mpe bómóna bilongi ya bato ntango Satana ayebi ete akotálisama polele. Sikawa, nazali kolobela na ntina na bato te. Kasi likambo ezali ete Satana azali kokonza bomoi na bango na nzela ya lisumu, botali makambo likolo likolo, mpe bokono. Kasi bosengeli komona bilongi na bango. Satana ayebi ete akotalisama polele, na yango mbongwana ya lolenge mosusu ezali kosalema na bilongi ya bato. Satana azali kobanga. Ayebi ete Molimo na Nzambe ebelemi mpo na komonisa bato misala na ye. Yango nde ntina ayinaka mpenza mayangani oyo. Ntango bankombo bizali kobengama mpe bokono komonisama, Satana ayinaka yango. Sikawa yango ezali nini? Ezali botangi ya makanisi te, ezali telepati te, ezali mpe kindoki te. Ezali EMONISELI na nzela ya Molimo Mosantu. Yango nde nzela bobele moko nakoki koyeba yango. Na ntembe te, moto ya makanisi ya mosuni akobenga yango nkombo nyonso, kasi akobenga yango Molimo Mosantu te.

Botika natalisa bino ntina mosusu mpo na yango Satana ayinaka Buku oyo ya Emoniseli na Yesu Klisto kati na lingomba. Ayebi ete Yesu Klisto azali ndenge moko lobi loleki, lelo mpe libela, mpe Abongwanaka te. Ayebi makambo mingi mpenza koleka oyo bato likindo ntuku libwa likolo na monkama bayebi. Ayebi ete lokola Nzambe abongwanaka te kati na bizaleli na Ye, na bongo Abongwanaka mpe te na lolenge na Ye ya kosala. Satana ayebi na ye ete lingomba ya ebandeli na Pantekote, ná nguya ya Nzambe (Malako 16 kati na mosala) ezali Lingomba ya Solo, oyo Yesu azali koloba ete ezali ya Ye. Mosusu nyonso ezali ya lokuta. Na ntembe te.

Sikawa, bomikanisela likambo oyo. Klisto kati na Lingomba ya Solo ezali kolandana ya Buku ya Misala. Kasi Buku ya Emoniseli ezali kotalisa ndenge nini molimo ya motemeli ya Klisto akokota kati na lingomba mpe akokomisa yango mbindo, móto te mpe mpio te, na makambo ya libanda mpe ezangi nguya. Ezali kotalisa Satana polele, komonisáká misala na ye (komeka koboma bato ya Nzambe mpe bobebisi lokumu ya Liloba na Nzambe), kino na ntango akobwakama na libeke na móto. Satana azali kobundisa yango. Akoki koyikela yango mpiko te. Ayebi ete soki bato bazwi EMONISELI YA SOLO ya LINGOMBA YA SOLO mpe oyo yango ezali, eloko nini azali kobunda mpo na yango, mpe lisusu AKOKI KOSALA MISALA MINENE KOLEKA, wana akozala lipinga oyo ekoki kolongama te. Soki bazwi emoniseli ya solo ya milimo mibale oyo ezali kosala makambo kati na lingomba ya Baklisto, mpe na nzela ya Molimo na Nzambe, basosoli mpe batelemeli molimo ya motemeli na Klisto, Satana akozala na nguya te liboso na Lingomba yango. Ye akolonga mpenza te lelo, kaka lokola na ntango oyo Klisto atemelaki makasi na ye nyonso ntango alingaki kozwa bokonzi likolo na Ye na biliki. Iyo, Satana ayinaka emoniseli. Kasi biso tolingaka yango. Ná emoniseli ya solo kati na bomoi na biso, bikuke ya ewelo ekoki kolonga biso te, kasi biso tokolonga na yango.

Bobosana te ndenge nalobaki na ebandeli ya liteya oyo ete Buku oyo tozali kotanga ezali emoniseli ya solosolo ya Yesu Ye moko kati na lingomba mpe mosala na Ye na bileko oyo ezali koya. Na sima nalobaki ete esengeli Molimo Mosantu mpo na kopesa biso emoniseli; soki bongo te tokozanga kozua yango te. Na komemáká makanisi oyo mibale elongo, bokomona ete ekosenga bobele boyekoli ya mpamba ná kokanisa te mpo na kokómisa Búku oyo solo. Ekosengela mpo na yango mosala ya Molimo Mosantu. Elingi koloba ete Buku oyo ekoki komonisama na moto nyonso te kasi bobele na bato ya lolenge mosusu. Ekosenga moto oyo azali na bososoli to lolenge ya mosakoli. Ekosenga makoki ya koyoka Nzambe koloba. Ekosénga kolakisama ya molimo, ezali kaka te kokokanisa eteni moko ya makomi na mosusu, atako kosala bongo ezali na yango malamau. Kasi libombami eséngaka kolakisama ya Molimo, soki te ekososolama te. Boni tosengeli mpenza koyoka Nzambe mpe komifungola mpe komikaba na Molimo mpo na koyoka mpe koyeba.

Ndenge nasilaki koloba, Buku oyo (Emoniseli) ezali suka ya Makomi. Etiami kutu na suka kati na kanó ya Makomi; esika esengeli kozala. Sikawa bokoki koyeba mpo na nini elobami ete moto soko nani oyo akotanga to mpe akoyóka yango apambwami. Ezali emoniseli ya Nzambe nde ekopesa yo bokonzi likolo na diabulu. Bokoki mpe komona mpo na nini baoyo bakobakisa to kolongola uta na yango bakolakama mabe. Ekosengela kozala bongo, mpamba te nani akoki kobakisa to kolongola uta na emoniseli oyo ebongi be ya Nzambe bongo alónge monguna? Ezali na yango pete. Eloko moko te ezali oyo ekokani na nguya ya kolonga lokola emoniseli ya Liloba. Bomoni, na molongo ya misato, lipamboli ezali kopesama na baoyo bazali kotia bokebi ya ndenge mosusu na Buku oyo. Nakanisi ete yango ezali kolobela momesano ya banganga-nzambe na Kondimana na Kala, ya kotanga Liloba liboso na eyanganelo na ntongo. Bomoni, bato mingi bayebaki kotanga te na bongo nganganzambe asengelaki kotanga mpo na bango. Lokola ezalaki Liloba, lipamboli ezalaki wana. Ata soki bazalaki kotanga to soki bazalaki koyoka yango.

"Ntango ekómi pene." Ntango ebélémáki liboso te. Na bwanya mpe mwango na Nzambe, emoniseli oyo ya nguya (ata eyebamaki mobimba na Nzambe), ekokaki kopesama te na ntango wana. Na yango biso toyekoli libongi moko ... emoniseli ya Nzambe mpo na eleko moko na moko ekoki koya bobele na eleko yango, mpe na ntango moko ya sikisiki. Botala lisolo ya Yisalaele. Emoniseli ya Nzambe epai na Mose eyaki bobele na ntango moko boye ya mambi ma kala, mpe eyaki mpenza-mpenza na ntango bato balelaki epai na Nzambe. Yesu, Ye moko, ayaki na litondi ya ntango, Ye oyo Azali Emoniseli mobimba ya Bonzambe. Mpe na eleko oyo (Laodikia), emoniseli ya Nzambe ekoya na ntango oyo ebongi. Ekoumela te, ekoya mpe liboso na ntango na yango te. Bokanisa likolo na yango mpe botia bokebi, mpamba te tozali kati na mikolo ya suka lelo.

### **Kopesa Mbote**

Emoniseli 1: 4-6.

"Yoane, epai na mangomba nsambo oyo ezali na Azia : Tika ete Ngolu mpe kimia kowuta na Ye oyo azali, azalaki mpe azali koya; mpe kowuta na Milimo sambo oyo bazali liboso na kiti na Ye ya bokonzi;

Mpe Kowuta na Yesu Klisto, Motatoli ya sembo, mpe Mobotami ya liboso kati na bakufi, mpe Mokonzi ya bakonzi ya mokili. Epai na Ye oyo alingaka biso mpe asukoli biso na masumu na biso na nzela ya makila na Ye.

Ye oyo akomisi biso ekolo ya bakonzi mpe banganga-nzambe mpo na Nzambe, Tata na Ye; Tika ete nkembo mpe nguya ezonga epai na Ye mpo na libela na libela! Amen."

Liloba oyo "Azia," ezali kotalisa Azia ya Moke. Ezali eteni moko moke ya mabele na bonene ya mboka Indiana. Mangomba nsambo wana ya Azia eponamaki kati na ba mangomba mosusu nyonso na ntina na lolenge ya bizaleli na bango, bizaleli moko wana bizwamaki kati na bolandani ya bileko na bikeke oyo biyaki na sima.

Milimo nsambo liboso na ngwende ezali Molimo Wana oyo ezalaki kati na moko na moko ya batindami nsambo, kopesáká bango mosala na bango mpo na eleko oyo moko na moko abikaki.

Nzokande maloba nyonso oyo: 'Ye Oyo azali', 'Ye Oyo azalaki', mpe 'Azali koya', 'Motatoli ya Sembo', 'Mobotami ya Liboso kati na bakufi', mpe 'Mokonzi ya bakonzi ya mokili', 'Alifa mpe Omega', mpe 'Mozwi-na-nguya-nyonso', ezali bakombo mpe bolimboli ya MOTO MOKO KAKA, Oyo azali Nkolo Yesu Klisto, Ye nde asukoli biso na masumu na biso kati na makila na Ye moko.

Molimo na Nzambe kati na Yoane ezali koloba bongo mpo na kotalisa Bonzambe oyo Eleki Likolo ya Yesu Klisto mpe mpo na komonisa ete Nzambe azali Nzambe MOKO. Lelo libunga moko monene ezali. Yango ezali ete ba-Nzambe bazali misato na esika ya moko. Emoniseli oyo, lolenge Yesu Yemei apesaki yango na Yoane, ezali kosembola libunga. Ezali te ete ba-Nzambe bazali misato, kasi Nzambe moko ná misala misato. Nzambe azali MOKO ná bibiangelo misato: Tata, Mwana, mpe Molimo Mosantu. Yango nde emoniseli ya nguya oyo eklezia ya ebandeli ezalaki na yango, mpe yango esengelaki kozongisama na mokolo oyo ya suka elongo na lolenge ya malamau ya libatishi na mai.

Sikawa bato ya likindo bakondima elongo na ngai te, mpamba te botala oyo ekomami na zulunale moko ya Baklisto oyo eyebani: "Malakisi wana (likolo na bonzambe misato) ezali mpenza na katikati, na motema ya Kondimana na Kala. Ezali mpe lokola na katikati ya Kondimana na Sika. Kondimana na Sika lokola Kondimana na Kala, ezali mpe kotelemela likanisi oyo ezali koloba ete banzambe bazali mingi koleka moko. Nzokande Kondimana na Sika ezali koteya biso polele mpenza ete Tata azali Nzambe, ete Mwana azali Nzambe, mpe Molimo Mosantu azali Nzambe, mpe ete bamisato oyo bazali TE biteni misato ya Moto moko, kasi bato misato oyo bazali na boyokani ya malamum mpenza kati na bango. Wana nde tozali na malakisi ya nkembo ya Bato Misato kasi Nzambe bobele moko. "

Balobi lisusu ete : "Nzambe, engebene na Biblia, azali kaka moto moko mpamba te, kasi Azali bato misato kati na Nzambe moko. Yango nde libombami monene ya Bosato".

Na ntembe te, ezali libombami. Ndenge nini bato misato bakoki kozala kati na Nzambe moko? Ezali kaka te ete Biblia oyo elobeli yango ezali te, kasi etalisi lisusu bozangi mayele ya lisosoli. Bato misato, atako bakokani, bazali kosala banzambe misato, to lokótá ebungisi ndimbola na yango mobimba.

Boyoka naino maloba oyo lisusu: "Nazali Alifa mpe Omega, Ebandeli mpe Suka; elobi Nkolo, Ye Oyo Azali, Oyo Azalaki, mpe Oyo Azali koya, Mozwi-na-Nguya-Nyonso ". Oyo nde Bonzambe. Oyo azali bobele mosakoli te, moto. Oyo azali Nzambe. Mpe ezali emoniseli ya Banzambe misato te, kasi ya Nzambe MOKO, Oyo ya Nguya Nyonso.

Bazalaki kondima Banzambe misato na ebandeli ya lingomba te. Okoki kozua kondima ya lolenge wana te kati na bantoma. Ezalaki nsima na eleko ya bantoma nde malakisi oyo ekotisamaki, mpe ekómaki mpenza mokakatano mpe malakisi ya moboko na Likita ya Nicée. Malakisi ya Bonzambe ememaki bokabwani na Nicée. Mpe uta na bokabwani yango, bangámbo mibale ebimaki. Ngambo moko ekotaki na ba-Nzambe mingi, kondimáká ba-Nzambe misato, mpe ngambo mosusu kondimiáká ete Nzambe azali moto moko. Na ntembe te yango esalemaki mbala moko te, kasi suka suka esalemaki, mpe tozalaki na yango lelo. Kasi Emoniseli ya Molimo na mangomba na nzela ya Yoane, ezalaki "Ngai nazali Nkolo Yesu Klisto, mpe Nazali MOBIMBA na yango. Nzambe mosusu azali te. Bongo Atiaki elembo na Ye likolo na Emoniseli oyo.

Botala likambo oyo: Nani azalaki Tata na Yesu? Matai 1: 18 elobi: "Malia Akumbaki zemi na nguya ya Molimo Mosantu". Kasi Yesu Ye moko, alobaki ete Nzambe nde azalaki Tata na Ye. Nzambe Tata ná Nzambe Molimo Mosantu, ndenge tolobaka mbala mingi maloba oyo , esali Tata mpe Molimo eloko MOKO. Solo mpenza bazali moko, soki te Yesu azalaki na Batata mibale. Kasi botala, Yesu alobaki ete Ye ná Tata na Ye bazalaki Moto moko — mibale te. Yango esali Nzambe MOKO.

Lokola masolo ma kala mpe na Makomi eyebisi biso ete ezali solo, bato bazali komituna esika likanisi ya misato wana eutaki. Ekomaki malakisi ya moboko na Likita ya Nicée na mobu 325 sima na liwa ya Klisto. Bosato oyo (liloba moko oyo ezali kutu kati na Makomi te) etongamaki likolo na banzambe mingi ya Roma. Bato na Roma bazalaki na banzambe mingi oyo bazalaki kosambela. Bazalaki mpe kosambela bankóko mpe kotala bango lokola balobeli. Ezalaki na bongo pete mpo na kopesa bankombó ya sika na banzambe ya kala, na yango tozali na basantu mpo na kotalisa lokola soki euti na Biblia. Boye na esika ya Jupiter, Venice, Mars, mpe bongo na bongo, tozali na Polo, Petelo, Fatima, Christopher, mpe bongo na bongo. Bakokaki te kotambolisa losambo na bango ya bapakano ná Nzambe bobele moko; na yango, bakabolaki Ye na biteni misato, mpe bakomisaki basantu balobeli na bango ndenge basalaki na bankóko na bango liboso.

Banda wana bato bazangaki kososola ete Nzambe azali bobele moko ná misala to komonisama misato. Bayebi ete Nzambe azali moko engebene na Makomi, kasi bazali komeka kokómisa yango liteya ya mabanzo oyo Nzambe azali lokola mbuma ya vinyo; bato misato, oyo bazali na Bo-Nzambe moko mpe bazali kokabola yango ndenge moko na bango nyonso. Nzokande elobami polele awa na Emoniseli ete Yesu azali "Oyo Azali", "Oyo Azalaki", mpe "Oyo Akoya". Azali "Alifa mpe Omega", yango elingi koloba ete Azali "A kino Z" to YANGO NYONSO. Azali nyonso — Mozwi-na-Nguya-Nyonso. Azali Felele kitoko na Salono, Lísi ya Lobwakú, Monzoto Engengaka na Ntongo, Nzete ya Sembo, Tata, Mwana, mpe Molimo Mosantu. Azali Nzambe, Nzambe Mozwi-na-Nguya-Nyonso. NZAMBE MOKO.

1Timoté 3: 16 elobi: "Na ntembe te, libombami ya bonzambe ezali monene, Nzambe amonisamaki polele kati na nzoto, Atangamaki moyengebene na Molimo, Amonanaki na banje, Ateyamaki na bikolo ya bapaya, Andimamaki na mokili, mpe akamatamaki nakati na Nkembo". Yango nde Biblia elobi. Elobi ata eloko moko te na ntina na moto ya liboso to ya mibale to ya misato awa. Elobi ete Nzambe amonisamaki kati na nzoto. Nzambe Moko. NZAMBE MOKO wana amonisamaki polele kati na nzoto. Yango esengelaki kokata likambo. Nzambe ayaki na lolenge ya moto. Yango ekomisaki Ye NZAMBE MOSUSU te. AZALAKI NZAMBE, NZAMBE MOKO WANA. Na ntango wana, ezalaki emoniseli, ezali mpe emoniseli sikawa. Nzambe Moko.

Tika tozonga na Biblia mpo na komona eloko oyo Azalaki na ebandeli engebene na emoniseli oyo Apesaki na ntina na Ye moko. Yehova monene amonanaki na Yisalaele kati na likonzi na móto. Lokola

Mwanje na Boyokani, Azalaki kobika kati na likonzi na móto yango mpe Akambaki Yisalaele mokolo na mokolo. Na tempelo, Asakolaki boyei na Ye na lipata monene. Bongo mokolo moko, Amonisamaki na nzoto oyo ebutamaki na mongondo, oyo ebongisámákí mpo na Ye. Nzambe oyo azalaki kofanda likolo na bahema ya Yisalaele Alataki sikawa hema ya mosuni, mpe afandaki lokola moto kati na bato. Kasi Azalaki NZAMBE MOKO wana.

Biblia ezali koteya ete NZAMBE AZALAKI KATI NA KLISTO. NZOTO ezalaki Yesu. Kati na Ye, litondi mobimba ya Bonzambe ezalaki kofanda na NZOTO. Eloko moko te ekoki kozala polele koleka likambo oyo. Libombami, iyo. Kasi ezali mpenza solo — ekoki komonana polele koleka oyo te. Bongo soki Azalaki bato misato te na ntango wana, Akoki te kozala misato sikawa. NZAMBE MOKO: mpe Nzambe yango moko akómaki mosuni.

Yesu alobaki: “Nauti na Nzambe mpe Nakozonga (Nazongi) na Nzambe.” Yoane 16: 27-28. Yango mpenza nde esalemaki. Alimwaki na mokili na nzela ya liwa na Ye, bokundami na Ye, lisekwa na Ye, mpe komata na Ye na likolo. Na sima Polo akutanaki na Ye na nzela ya Damaseke mpe Alobaki na Polo ete: “Saulo, Saulo, mpo na nini ozali konyokola Ngai?” Polo alobaki: “Yo ozali Nani, Nkolo?” Alobaki: “Nazali Yesu.” Azalaki likonzi na móto, pole oyo ezali kongenga makasi. Azongaki bobele ndenge Alobaki ete Akosala yango. Azongaki na lolenge moko wana oyo Azalaki liboso na Ye kozua mongombo ya mosuni. Ezali mpenza bongo nde Yoane amonaki yango. Yoane 1: 18 “Moto ata moko te amoná Nzambe; Mwana Mobotami Se Moko oyo azali kati na ntolo ya Tata, Ye nde atalisi Ye”. Botala malamumu esika Yoane alobi ete Yesu AZALI. Azali KATI na ntolo ya Tata.

Luka 2: 11 elobi,

“Mobikisi abotameli bino lelo kati na engumba na Dawidi, Ye azali Klisto Mobikisi.

Abótamaki Klisto, nsima na mikolo mwambe, ntango Akatamaki ngenga, babengaki nkombo na Ye Yesu, bobele lolenge mwanje ayebisaki bango. Ngai nabótámá Branham. Ntango nabotamaki bapesaki ngai nkombo ya William. Ye azalaki KLISTO, kasi Apesamaki nkombo awa na nse kati na bato. Mongombo oyo ya libanda, oyo bato bakokaki komona ebengamaki Yesu. Azalaki Nkolo na Nkembo, Mozui-na-Nguya-Nyonso oyo amonanaki kati na nzoto. Azali Nzambe Tata, Mwana, mpe Molimo Mosantu. Azali nyonso wana.

Tata, Mwana, mpe Molimo Mosantu ezali bobele bibiangelo. Yango ezali ba-nkombo te. Yango nd ntina tozali kobatisa na Nkombo na Nkolo Yesu Klisto, mpo yango ezali nkombo, ebiangelo te. Ezali nkombo ya bibiangelo wana, kaka lokola ozui bebé ya sika, oyo azali mwana mobali mpe opesi ye nkombo. Ye azali bebé, mwana mobali ezali ebiangelo, na sima opesi ye nkombo, John Henry Brown. Yo okobatisa bobele na 'Nkombo na Yesu' te. Ezali na bankoto ya bayesu kati na mokili mpe babiká kutu ata liboso na Yesu, Mobikisi na biso. Kasi ezali bobele na moto moko kati na bango oyo abotamá Klisto, “Nkolo Yesu Klisto”.

Bato balobaka ete Yesu Azali Mwana ya Seko na Nzambe. Sikawa oyo ezali te kotelemelana? Nani asilá koyoka koloba na ntina 'Mwana' moko ázala Seko? Bana bazali na ebandeli, kasi oyo ezali ya seko etikala kobanda soko moke te. Azali Nzambe ya Seko (Yawe) Amonisami kati na nzoto.

Kati na Nsango Malamumu ya Yoane elobami:

“Na ebandeli Liloba azalaki mpe Liloba azalaki mboka na Nzambe, mpe Liloba azalaki Nzambe. Mpe Liloba akómaki mosuni mpe Afandaki kati na biso.”

Ye azalaki Motatoli na Sembo mpe na Solo ya Liloba na seko ya Tata. Azalaki Mosakoli mpe akokaki koloba makambo Tata apesaki etinda ete Aloba. Alobaki: “Tata na Ngai azali kati na Ngai”. Yango nde oyo Yesu, mongombo alobaki: “Tata na Ngai azali kati na Ngai”.

Nzambe azali na bibiangelo mingi: 'Boyengebene na Bisó', Kimya na Bisó', “Oyo Azali Ntango Nyonso”, 'Tata', 'Mwana', mpe 'Molimo Mosantu'; kasi Azali bobele nkombo moko ya bomoto mpe Nkombo yango ezali Yesu.

Bobulungana te mpo ete Azali na misala misato to mpo ete Azali komimonisa polele na ba ndenge misato. Na mokili Azalaki Mosakoli; na likolo Azali Nganga-Nzambe; mpe ntango Azali kozonga na mokili, Azali Mokonzi na bakonzi. “Ye oyo Azalaki — Ezali Yesu, Mosakoli. “Ye oyo Azali” — Ezali Ye, Nganganzambe Mokonzi, oyo azali kolobela — Moto Oyo akoki kosimbama na mayoki ya bolembu na biso. “Oyo Azali Koya” — Elingi koloba Mokonzi oyo azali koya. Na mokili, Azalaki Liloba — Mosakoli. Mose alobaki na ntina na Ye: “Yawe Nzambe na bino Akotelemisela Mosakoli moko lokola ngai, mpe ekosalema ete bato oyo bakoyoka maloba ya Mosakoli yango te bakolongolama na kati na bato.”

Botala makambo oyo etali Yesu. Na mokili Azalaki Mosakoli, Mwana na mpate, mpe Mwana. Yango ekomisaki Ye misato te. Yango ezalaki bobele komonisama to misala ya Moto wana Moko : Yesu.

Sikawa, eteni moko ya Makomi ezali, oyo bato ya ba-Nzambe misato balingaka mingi mpe bakanisi ete ezali kotalisa polele ete bato bazali mingi koleka na kati na Bonzambe.

Ezali Emoniseli 5: 6-8 :

“Bongo natalaki, mpe talá, katikati na kiti na bokonzi mpe ya bikelamo minei ya bomoi, mpe katikati na bampaka, Mwana na Mpate moko atelemaki lokola ete asilaki kobomama. Azalaki na maseke sambo mpe miso sambo oyo ezali Milimo sambo ya Nzambe oyo etindami na mokili mobimba.

Mpe Ayaki mpe Akamataki búku na loboko ya mobali ya Ye oyo afandaki na kiti na bokonzi.

Mpe ntango Akamataki búku, bikelamo minei ya bomoi mpe bampaka tuku mibale na minei bagumbamaki liboso na Mwana na Mpate, moko na moko kati na bango asimbaki nzenze mpe kopo ya wolo etondá na malasi oyo ezali mabondeli ya basantu ”.

Ya solo baverse oyo, soki okamati bobele yango moko, ekoki komonana lokola ete makanisi na bango ezali solo. Botala malamú; nalobi, soki bozui baverse yango bobele yango moko.

Ata bongo, botanga Emoniseli 4: 2-3 mpe 9-11:

“Na mbala moko, namemamaki na Molimo: mpe tala, kiti moko ya bokonzi etiamaki na likolo, mpe Moto Moko afandaki na kiti na bokonzi yango.

Mpe Ye oyo Afandaki na kiti yango azalaki komonana lokola libanga ya yasipe mpe saridwane: mpe monama moko ezingelaki kiti yango ya bokonzi mpe ezalaki komonana lokola emerode.

Bongo ntango bikelamo na bomoi bazali kopesa nkembo mpe lokumu mpe matondi na Ye Oyo afandi na kiti na bokonzi, Ye Oyo azali na bomoi libela na libela,

bampaka ntuku mibale na minei bagumbamaki liboso na Ye Oyo afandi na kiti na bokonzi mpe basambelaki Ye Oyo azali na bomoi libela na libela, mpe babwakaki mitole na bango liboso na kiti na bokonzi nakolobáká :

Nkolo mpe Nzambe na biso, Obongi na Nkembo, na lokumu, mpe na nguya: mpamba te Yo okelá biloko nyonso, mpe yango ekelamaki mpo na mokano na Yo.”

Na bokebi nyonso botala molongo ya mibale elobi: “MOKO” (mibale to misato te kasi MOKO) afandaki na kiti na bokonzi. Na molongo ya misato elobi: “Ye” (Bango TE) azalaki komonana lokola libanga ya yasipe. Na molongo ya libwa elobi ete bikelamo na bomoi bapesaki lokumu na “YE” (bango te). Na molongo ya zomi elobi ete bampaka bagumbamaki liboso na “YE” (bango te). Na molongo ya zomi na moko elobi ete bagangaki, “Yo Obongi, NKOLO na biso” (Ba-nkolo na biso te). Na molongo ya zomi na moko lisusu ekomami ete Ye Oyo afandi na kiti na bokonzi azalaki “Mokeli ”, Oyo azali Yesu (Yoane 1: 3), Oyo azali Nzambe-Molimo- Yehova ya Kondimana na Kala (Ebandeli 1:1).

Kasi tosuka bobele wana te. Totanga sikawa na Emoniseli 3: 21,

“Moto oyo akolonga, Nakopesa ye nzela ya kofanda elongo na Ngai na kiti na Ngai ya Bokonzi, lokola Ngai mpe nalongaki mpe nafandi ná Tata na Ngai na kiti na Ye ya Bokonzi.”

Botanga mpe Baebele 12: 2,

“Tika ete miso na biso étála kaka Yesu oyo azali Mobandisi mpe Mokokisi ya kondima na biso; Ye oyo na ntina ya esengo oyo ebongisamaki liboso na Ye, Andimaki kokufa na ekulusu mpe koyoka nsoni, mpe afandi na loboko ya mobali ya Kiti ya Bokonzi ya Nzambe.”

Botala, engebene na Yesu, Ye moko, Oyo akomaki Emoniseli, Afandi ELONGO na Tata. Molimo kati na Polo (Molimo oyo ezali Molimo ya Klisto, mpo Yango nde Molimo ya Lisakoli; Liloba ezali koya na nzela na yango) elobi ete Ye afandi na LOBOKO YA MOBALI ya Nzambe. Kasi ntango Yoane atalaki, amonaki bobele “MOKO” likolo na Kiti na Bokonzi. Mpe ezalaki bobele na Emoniseli 5: 6-8 (oyo elandi Emoniseli 4: 2-3 na ntango) nde tomoni “mwana na mpate” kokamata buku epai na “YE” Oyo afandaki na Kiti na Bokonzi, ndenge etalisami na Emoniseli 4:2-3 mpe 9-10. Ezali nini? Ezali libombami ya “NZAMBE MOKO.” Ye (Yesu), Abimaki uta na Nzambe, Amonisamaki kati na nzoto, Akufaki mpe Asekwaki lisusu, mpe Azongaki “Kati na Tata”. Ndenge Yoane alobaki: “Mwana bobele moko Oyo azali KATI na Tata, nde Amonisi Ye.” Yoane 1: 18. Ekómáki ntango sikawa mpo na Nzambe (Masiya) koya mpo na kozua Mwasi na Ye ya Libala, bongo na sima komitalisa Ye Moko (komimonisa Ye moko) epai na Yisalaele. Na yango tozali lisusu komona Nzambe koya mpo na kobanda boyokani ya nzoto ná moto lokola “Mwana na Dawidi, Mokonzi na Bakonzi mpe Nkolo na Bankolo, mpe Mobali na Libala ya Mwasi na Libala ya Mabótá.” Ezali TE Banzambe “mibale”, kasi NZAMBE MOKO mpamba komimonisáká nguya na Yenya misala misato mpe bibiangelo na Ye.

Bato bayebaki ete Azalaki Mosakoli. Bayebaki elembo ya Masiya oyo ekokaki koya bobele na nzela na mosakoli. Yoane 1: 44-51,

“Sikawa Filipino azalaki moto ya Betesaida, engumba ya Andele ná Petelo.

Filipo akutanaki na Natanaele, mpe alobaki na ye ete: Biso tomoni Ye Oyo Mose akomaki kati na buku ya mobeko, mpe Oyo basakoli balobelaki; Yesu ya Nazaleta, mwana na Yosefu.

Bongo Natanaele alobaki na ye ete: eloko moko ya malamú ekoki nde kobima uta na Nazaleta? Filipino azongiselaki ye ete: Yaka mpe okomona yo moko.

Yesu amonaki Natanaele koya epai na Ye, bongo alobaki na ntina na ye: Tala mo-Yisalaele ya solo-solo, kati na ye lokuta ezali te!

Natanaele alobaki na Ye : Oyebi ngai ndenge nini? Yesu azongiselaki Ye ete : Liboso na Filipino kobenga yo, wana ozalaki nanu na nse ya nzete ya mosuke, Namonaki yo.

Natanaele azongisaki mpe alobi na Ye : Labi, Yo ozali solo Mwana na Nzambe; Yo ozali Mokonzi na Yisalaele.

Yesu ayanolaki mpe alobaki na ye ete : Mpo nalobi na bino ete, Namonaki yo na nse na nzete ya mosuku, nde ondimi? Okomona makambo minene koleka oyo.

Mpe alobaki epai na ye : Solo, solo Nazali koloba na bino ete, sikawa bokomona likolo kofungwama mpe banje na nzambe komata mpe kokita likolo na Mwana na Moto. ”

Makoki ya kososola makanisi ya motema na moto esalaki ete moponami na Nzambe ákóma na koyeba ete azalaki liboso na Masiya, Liloba na Nzambe oyo epakólami.

Baebele 4: 12,

“Mpamba te Liloba na Nzambe ezali na bomoi mpe na nguya, na mopótú koleka mopanga nyonso ya mino mibale, ekotaka kino na kokabola bomoto na kati ná molimo, mpe matonga ná mafuta na yango, mpe ezali na likoki ya kososola makanisi mpe mikano ya motema.”

Ntango mwasi oyo azalaki na libulu na mai ayokaki Ye kososola makanisi ya motema na ye, ayebaki na bongo ete Ye azalaki mosakoli, alobaki ete ezali na makoki wana monene nde Masiya akoyebana.

Yoane 4: 7-26,

“Mwasi moko ya Mosamalia ayaki mpo na kotoka mai; Yesu alobaki na ye : Pesá Ngai mai ya komela.

(Mpamba te bayekoli na Ye, basilaki kokende na engumba mpo na kosomba bilei).

Bongo mwasi Mosamalia alobaki na Ye : Ebandi ndenge nini Yo oyo ozali Moyuda osenga ngai, mwasi Mosamalia, mai ya komela? Mpamba te Bayuda bazali koyokana te na bato ya Samalia.

Yesu ayanolaki mpe alobaki na ye ete : Soki óyébaka likabo na Nzambe mpe Nani oyo azali koloba na yo: Pesá ngai mai ya komela; yo nde olingaki kosenga na Ye mai ya komela, mpe Ye alingaki kopesa yo mai ya bomoi.

Mwasi yango alobi na Ye ete : Nkolo, Yo ozali na eloko ya kotokela mayi te, mpe libulu ezali mozindo; bongo mai yango ya bomoi Olingaki kozwa yango wapi?

Yo ozali monene koleka tata na biso Yakobo, oyo apesaki biso libulu oyo, mpe ye moko amelá mai na yango, elongo na bana na ye mpe bibwele na ye?

Yesu ayanolaki na ye ete : Moto nyonso oyo akomela mai oyo, akoyoka lisusu mposa ya mai.

Kasi moto nyonso oyo akomela mai oyo Ngai nakopesa ye akoyoka lisusu mposa ya mai te, kasi mai oyo Ngai nakopesa ye ekozala lokola etima na mai oyo ekotiola kino na bomoi na seko.

Mwasi yango alobaki na Ye : Nkolo, pesá ngai mai yango mpo ete náyoka lisusu mposa ya mai te mpe nazonga lisusu awa mpo na kotoka mai te.

Yesu alobaki na ye ete : Kende kobenga mobali na yo, mpe zonga awa.

Mwasi ayanolaki : Nazali na mobali te.

Yesu alobaki na ye ete : Yo olobi mpenza solo ete ozali na mobali te,

Mpamba te ozalaki na mibali mitano; mpe oyo ozali na ye sikawa azali mpe mobali na yo te : na yango olobi solo.

Mwasi yango alobaki na Ye : Nkolo, namoni ete Ozali mosakoli.

Batata na biso basambelaki Nzambe na ngomba oyo; mpe bino bozali koloba ete esika bato basengeli



kosambela ezali na Yelusaleme.

Yesu alobaki na ye ete : Mwasi, ndima Ngai, ntango ezali akoya, oyo ekozala na ngomba oyo te, na Yelusaleme mpe te, nde bokosambela Tata.

Bino bozali kosambela oyo boyebi te; biso toyebi nani tozali kosambela, mpamba te lobiko euti na Bayuda.

Kasi ntango ezali koya, mpe esili kokoka, wapi basambeli ya solo bakosambela Tata kati na Molimo mpe kati na solo; mpamba te Tata azali koluka bato oyo bagumbamelaka Ye na lolenge wana.

Nzambe azali Molimo, mpe bato oyo bazali kosambela Ye, basengeli kosambela Ye kati na Molimo mpe kati na solo.

Mwasi yango alobaki na Ye ete : Nayebi ete Masiya azali koya, Ye oyo abengami Klisto; ntango Akoya, Akoyebisa biso makambo nyonso.

Yesu alobaki na ye ete : Ngai oyo nazali koloba na yo nazali Ye. "

Na Emoniseli 15: 3 elobi,

"Mpe bazali koyemba loyembo ya Mose mowumbu na Nzambe, mpe loyembo ya MWANA NA MPATE, na kolobaka : Misala na Yo ezali minene mpe ya kokamwa, Nkolo Nzambe-Na-Nguya-Nyonso; Yo Mokonzi ya bikolo nyonso ..."

Bomoni yango? Mwana na Mpate, Nganganzambe Mokonzi oyo apesaki makila na Ye lokola mbondi likolo na ebonga ya mawa mpo na masumu na biso Azali Nkolo Nzambe-Na- Nguya-Nyonso. Wana nde mosala na Ye sikawa. Yango nde Azali kosala sikawa, kotalisáká makila na Ye mpo na masumu na biso. Kasi mokolo moko, Mwana na mpate oyo akokóma Nkosi ya Libota na Yuda. Akoya na nguya mpe nkembo na Ye, mpo na kozwa bokonzi na Ye mpe koyangela lokola Mokonzi. Azali Mokonzi oyo azali koya ya mokili oyo. Kasi yango elingi koloba te ete Ye Azali Mokonzi te sikawa. Mpo Ye Azali Mokonzi na biso, Mokonzi ya Basantu. Sikawa ezali bokonzi ya molimo. Yango ezali ya mokili oyo te kaka lokola biso tozali bato ya mokili oyo te. Yango wana biso tosalaka makambo kokesana na mokili. Ekolo na biso ezali na likolo. Tozali komonisa Molimo ya mokili esika tobotami mbala ya mibale, epai wapi Yesu azali Mokonzi. Yango wana basi na biso balátaka bilamba ya mibali te, bakátaka suki na bango te, mpe basálelaka bipakola-pakola te ná mpe biloko mosusu oyo mokili elingaka mingi. Yango wana mibali na biso bamelaka masanga ná makaya te, mpe babikaka kati na masumu te. Bokonzi na biso ezali bokonzi likolo na masumu mpe yango ezali kosalema na nzela ya nguya ya Molimo ya Klisto oyo ezali kobika kati na biso. Bokonzi nyonso ya mokili ekopanzana, kasi ya biso ekotikala.

Sikawa, tozalaki kolobela misala mpe komonisama ya Nzambe bobele moko ya solo mpe komona nkembo na Ye kati na boyekoli ya Makomi. Kasi Ye, bayebaka Ye na mayele ya motó te. Bayebaka Ye na Molimo; na emoniseli ya Molimo. Ye wana Oyo ayebanaki lokola Yesu na nzoto, Azongaki likonzi ya móto. Kasi Alakaki ete Akoya lisusu mpe Akofanda kati na bato na Ye na Molimo. Bongo na mokolo ya Pantekote, likonzi na móto wana ekitaki mpe emikabolaki na ndemo na móto likolo na moko na moko na bango. Nzambe azalaki kosala nini? Azalaki komikabola kati na lingomba, kopesáká na mibali mpe basi nyonso wana eteni moko ya Ye moko. Amikabolaki Ye moko kati na lingomba na Ye, kaka ndenge Alobaki ete Akosala.

Yoane 14: 16-23,

"Mpe Ngai nakosenga epai na Tata, mpe Akopesa bino Mosungi mosusu, mpo ete Áfanda elongo na bino libela;

Molimo na Solo; Molimo oyo mokili ekoki koyamba te, mpo ete ezali komona Ye te mpe eyebi Ye te; kasi bino boyebi Ye, mpamba te azali elongo na bino, mpe Akofánda kati na bino.

Nakotika bino lokola bana bitike te: Ngai nakoya epai na bino.

Na mwa ntango moke, bamokili bakomona Ngai lisusu te, kasi bino bokomona Ngai, mpo ete Nazali na bomoi, bino mpe bokozala na bomoi.

Na mokolo yango bino bokoyeba ete Ngai nazali kati na Tata na Ngai, mpe bino kati na Ngai, mpe Ngai kati na bino.

Moto oyo alingi Ngai ezali ye oyo azali kobatela mibeko na Ngai mpe azali kotia yango na misala; bongo ye oyo alingi Ngai, akolingama mpe na Tata na Ngai, Ngai mpe nakolinga ye mpe Nakomimonisa epai na ye.

Yuda, Mokeliota te, alobaki na Ye ete : Nkolo, ndenge nini yango Okomimonisa epai na biso, kasi epai na mokili te?

Yesu ayanolaki ete : Moto oyo alingi Ngai, akobátela maloba na Ngai; mpe Tata na Ngai akolinga ye, bongo tokoya epai na ye, mpe tokofanda elongo na ye. "

Alobaki ete akobondela epai na Tata Oyo akotinda Mosungi mosusu Oyo asilaki kozala ELONGO na bango (bayekoli) kasi na KATI na bango TE. Ezalaki Klisto. Na sima, na molongo ya Ntuku mibale na misato, na kolobáká na ntina na Ye moko mpe na ntina na Tata, Alobaki : " BISO tokoya". Yango wana : "Molimo ezali koya, Molimo Moko wana ya Nzambe oyo emimonisaki lokola Tata, mpe lokola Mwana, mpe ekomonisama lisusu kati na bamingi" — NZAMBE MOKO Oyo azali Molimo.

Yango wana moto ata moko te akoki koya mpe koloba ete moto ya bulee ezali pápa to moto ya bulee ezali episkopo moko to nganganzambe. MOTO YA BULEE ezali Klisto, Molimo Mosantu, kati na biso. Ndenge nini bokitani ekoki kosakola ete bandimi bazali na liloba moko te ya koloba? Moko na moko azali na eloko ya koloba. Moko na moko azali na mosala, moko na moko azali na mosala. Molimo Mosantu ayaki na Pantekote mpe Amikabolaki na moko na moko, mpo ete oyo Klisto alobaki ekokisama,

"Na mokolo yango, bino bokoyeba ete Ngai nazali kati na Tata na Ngai, mpe bino kati na Ngai mpe Ngai kati na bino."

Yoane 14: 20.

Ngai Monene, Nzambe na Nguya nyonso, ayei lokola Molimo mpo na kotondisa lingomba na Ye ya solosolo. Azali na makoki ya kokende bisika nyonso Ye alingi, mpe likolo na moto nyonso Ye alingi. Bisu tosalaka "bato ya bulee" te kati na biso, kasi losambo mobimba ya solo ya Nkolo ezali bulee, na ntina ya bozali ya Molimo Mosantu. Ye nde, Molimo Mosantu, azali bulee, losambo ezali bulee na yango moko te.

Sikawa emoniseli yango oyo : Yesu Klisto azali Nzambe. Yawe ya Kondimana na Kala azali Yesu na Kondimana ya Sika. Ata omeki makasi ndenge nini, okoki kotalisa polele te ete Banzambe bazali misato. Kasi esengeli mpe emoniseli na nzela na Molimo Mosantu mpo na kososolisa yo ete solo Azali Moko. Esengeli emoniseli mpo na komona ete Yawe na Kondimana na Kala azali Yesu na oyo ya Sika. Satana akotaki kati na lingomba mpe abomaki bato miso na bosolo oyo. Ntango miso na bango ebomamaki na yango, eumelaki te kino Lingomba ya Roma etikaki kobatisa na Nkombo na Nkolo Yesu Klisto.

Nayebi ete esengeli emoniseli ya solo mpenza kouta na Molimo Mosantu mpo na komona bosolo na ntina na Bonzambe, na mikolo oyo wana tozali kati na bobebisami mpenza ya Makomi mingi kati na Biblia. Kasi lingomba oyo ezali na elongá, lingomba molongi etongami likolo na emoniseli, na yango tokoki kotya motema ete Nzambe akomonisa biso bosolo na Ye. Nzonkande, ozali mpenza na bosenga ya emoniseli te mpo na batisimo ya mai. Yango ezali mpenza wana liboso na elongi na yo. Ekoki nde kosalema ata mpo na miniti moko ete bantoma bámemama mosika na etinda ya sikisiki ya Nkolo, ya kobatisa na Nkombo na Tata mpe ya Mwana mpe ya Molimo Mosantu, bongo bazwama kati na bozangi botosi na nkô? Bango bayebaki oyo Nkombo yango ezalaki, mpe esika ata moko te ezali kati na Makomi, wapi bango babatisaki na lolenge mosusu kasi na Nkombo na Nkolo Yesu Klisto. Mayele ya bomoto ekoyebisa yo ete Mokanda ya Misala ezali lingomba kati na mosala, mpe soki bango babatisaki bongo, boye yango nde lolenge ya kobatisa. Sikawa soki okanisi ete ezali makasi, okanisi nini mpo na likambo oyo? Moto nyonso oyo abatisamaki te na Nkombo na Nkolo Yesu asengelaki kobatisama lisusu.

Misala 19: 1-6: "Mpe esalemaki ete wana Apolosi azalaki na Kolinti, Polo, sima na ye koleka na bikólo ya likolo ya Azia, akómáki na Efese. Kuna akutaki mwa ndambo ya bayekoli mpe atunaki bango : Bino bozwaki Molimo Mosantu, ntango bondimaki? Mpe bango balobaki na ye ete : Totikalá naino koyoka te ete Molimo Mosantu azalaka. Bongo ye alobaki na bango ete : Bongo libatisi ya ndenge nini mpenza bozwaki? Bango bazongisaki : Tozwaki libatisi ya Yoane. Bongo Polo alobaki : Yoane abatisaki na libatisi ya kobongola motema, azalaki koloba na bato ete basengelaki kondima Ye Oyo akoya sima na ye, elingi koloba Klisto Yesu. Ntango bayokaki likambo yango, babatisamaki na Nkombo na Nkolo Yesu. Ntango Polo atiaki maboko na ye likolo na bango, Molimo Mosantu akitaki likolo na bango; mpe bakomaki koloba minoko na sika mpe kosakola. " Yango wana mpenza. Bato malamumu oyo na Efese basilaki koyoka na ntina na Masiya oyo asengelaki koya. Yoane ateyaki Ye. Babatisamáki mpo na kobongola mitema na masumu, kotaláká LIBOSO mpo na kondimela Yesu. Kasi sikawa, ezalaki ntango ya kotala na SIMA epai na Yesu mpe kobatisama mpo na BOLIMBISI ya masumu. Ekomaki ntango ya koyamba Molimo Mosantu. Mpe wana bazuaki libatisi na Nkombo na Nkolo Yesu Klisto, Polo atiaki maboko na ye likolo na bango mpe Molimo Mosantu akitaki likolo na bango.

Oh, balingami wana na Efese bazalaki bato malamumu; mpe soki moto moko azalaki na makoki ya komiyóka ete abatelami, ezalaki bango. Botala boni bautaki mosika. Bango bakomaki kino na esika ya koyamba Masiya oyo asengelaki koya. Babelemaki mpo na Ye. Kasi bozali komona te ete na esika na yango, bazangaki Ye? Ye ayaki mpe Akendeki. Basengelaki kobatisama na Nkombo na Nkolo Yesu Klisto. Basengelaki kotondisama na Molimo Mosantu.

Soki obatisámá na Nkombo na Nkolo Yesu Klisto, Nzambe akotondisa yo na Molimo na Ye. Yango ezali Liloba.

Misala 19: 6, oyo totangi ezalaki kokokisama ya Misala 2: 38,

“Bobongola mitema, mpe bobatisama moko na moko na bino na Nkombo na Yesu Klisto mpo na kolimbisama ya masumu na bino, mpe bokozua likabo ya Molimo Mosantu.”

Bomoni, Polo, na nzela ya Molimo Mosantu, alobaki mpenza makambo Petelo alobaki na nzela na Molimo Mosantu. Mpe oyo elobamaki EKOKI TE kobongolama. Esengeli kozala ndenge moko kobanda na Pantekote kino ete moponami ya suka mpenza abátisama.

Bagalatia 1: 8,

“Kasi soki biso moko, to mwanje ya likolo, ateyi bino nsango malamumu oyo ekeseni na oyo biso toteyaki bino, tika ete alakelama mabe.”

Sikawa bamosusu kati na bino, bato ya Bomoko bozali kobatisa mabe. Bino bozali kobatisa mpo na kozongisama moto ya sika lokola soki kodindisama na mai ezali kobikisa yo. Kozongisama moto ya sika eutaka na mai te; ezali mosala ya Molimo. Moto oyo na nzela ya Molimo Mosantu apesaki etinda : “Bobongola mitema mpe bobatisama moko na moko na bino na Nkombo na Nkolo Yesu,” Alobaki te ete mai nde ezongisaka moto sika. Alobaki ete yango ezalaki bobele kotalisa polele “Iisosoli malamumu liboso na Nzambe.” Esili.

Petelo 3: 21,

“Mayi yango ezalaki elilingi ya libatisi oyo ebikisi bino sikawa (yango ezali kolongola mbindo ya nzote te, kasi eyano ya lisosoli malamumu liboso na Nzambe,) na nzela ya lisekwa ya Yesu Klisto.”

Nandimi yango.

Soki moto moko azali na makanisi ya mabe ete mambi ma kala makoki kotalisa polele libatisi ya lolenge mosusu kasi na Nkombo na Nkolo Yesu Klisto te, nakolinga kopesa ye toli ete atanga mambi ma kala mpo amona ye moko. Oyo ezali makomi ya lisolo ya solo ya Libatisi oyo esalemaki na Roma, na mobu ya 100, ya eleko na biso, mpe ekomamaki lisusu na Zulunalo TIME ya sanza ya Zomi na Mibale, mokolo ya mitano ya mobu 1955. “Mosungi atombolaki loboko na ye, mpe Publius Decius akotaki na ekuke ya esika ya kobatisa. Marcus Vasca, moteki mabaya, atelemaki na kati pisini ya mai oyo esukelaki ye na loketo. Azalaki komungamunga wana Publius azalaki kopusana pene na ye na kati ya pisini ya mai. Atunaki ye : 'Credis'? Publius ayanolaki : 'Credo'. 'Nandimi ete lobiko na ngai euti na Yesu Klisto, Oyo abakamaki na ekululu na nse na Ponsi Pilato. Nakufi elongo na Ye, mpo ete elongo na Ye nakoka kozwa Bomoi na Seko. ' Na sima, ayokaki maboko na ye ya makasi kosunga ye, wana amitikaki kokweisama na mokongo kati na mai, mpe ayokaki mongongo ya Marcus na matoi na ye : 'na batisi yo na Nkombo na Nkolo Yesu'; mpe mai ya malili efinikaki ye.”

Kino na ntango bosolo ebungaki (mpe ezongaki bobele na eleko oyo ya suka; elingi koloba uta na Likita ya Nicée kino na ekeke oyo) bazalaki bobele kobatisa na Nkombo na Nkolo Yesu Klisto. Kasi yango ezongi. Satana akoki te kopekisa bomonani ya emoniseli na ntango oyo Molimo alingi kopesa yango.

Ya solo, soki ba-Nzambe bazalaki misato, wana bokokaki na bino malamumu kobatisa mpo na Tata, mpe mpo na Mwana, mpe mpo na Molimo Mosantu. Kasi EMONISELI OYO EPESAMAKI EPAI NA YOANE ezalaki ete NZAMBE azali MOKO mpe Nkombo na Ye ezali NKOLO YESU KLISTO, mpe bozali kobatisa mpo na Nzambe MOKO mpe bobele moko. Yango nde ntina Petelo abatisaki na lolenge asalaki na Pantekote. Asengelaki kozala sembo na emoniseli oyo ezalaki : “Tika ete ndako nyonso ya Yisalaele bayéba ete Nzambe akómisi YESU MOKO WANA Oyo bino bobakaki na ekululu NKOLO MPE KLISTO.” Ye wana : “NKOLO YESU KLISTO.”

Soki Yesu azali Nkolo MPE Klisto, wana Ye (Yesu) azali, mpe akoki kozala eloko mosusu te kasi “Tata, Mwana, mpe Molimo Mosantu” kati na moto MOKO oyo amonisami kati na nzoto. Ezali TE “Nzambe kati na bato misato, bósáto epambwami,” kasi NZAMBE MOKO, MOTO MOKO ná bibiangelo misato ya minene, ná misala misato oyo ezalaki kotalisa bibiangelo yango. Boyoka yango lisusu : Yesu moko wana azali “Nkolo MPE Klisto.” Nkolo (Tata) mpe Klisto (Molimo Mosantu) bazali Yesu, mpo ete Ye (Yesu) azali nyonso mibale (Nkolo MPE Klisto).

Soki biso tozali komona te kati na yango emoniseli ya solo ya Bonzambe, wana eloko mosusu ya komonisa yango ezali te. Nkolo azali eloko mosusu TE; Klisto azali eloko mosusu TE. Yesu Oyo azali Nkolo Yesu Klisto — NZAMBE MOKO.

Mokolo moko, Filipino alobaki na Yesu: “Nkolo, lakisa biso Tata mpe yango ekokoka mpo na biso.” Yesu alobaki na ye: “Ngai naumeli ntango mingi elongo na bino mpe oyebi Ngai te? Ye oyo amoni Ngai amoni Tata, na bongo ntina nini ozali koloba, Lakisa biso Tata? Ngai ná Tata na Ngai tozali Moko. ” Nalobá yango mbala moko mpe mwasi moko alobaki: “Zelá mwa moke, Mesie. Branham, yo ná mwasi na yo bozali moko.”

Nalobaki: "Motindo wana te."

Alobaki: "Limbisa ngai?"

Na bongo natunaki ye: "Ozali komona ngai?"

Alobaki: "Iyo."

Nalobaki: "Omoni mwasi na ngai?"

Alobaki: "Te."

Nalobaki: "Boye, bomoko wana ezali ya motindo mosusu, mpo ete Ye alobaki : ntango bomoni Ngai, bomoni Tata."

Mosakoli alobaki ete pole ekozala na ntango na mpokwa. Kati na loyembo ekomami :

"Pole ekozala na ntango na mpokwa,  
Nzela ya nkembo bokomona yango solo,  
Kati na nzela ya mai, nde pole ya lelo,  
Bokundami kati na Nkombo ya motuya ya Yesu.  
Bilenge ná mibange, bobongola mitema na masumu na bino nyonso,  
Molimo Mosantu akokota, na ntembe te.  
Pole na mpokwa esili koya —  
Ezali solo ete Nzambe ná Klisto bazali moko. "

Eleki ntango molai te nazalaki kosolola na Rabi moko Moyuda. Ye alobaki na ngai : "Bino bapakano bokoki kokata Nzambe na biteni misato bongo bopesa Ye na mo-Yuda te. Bisó toyebi mingi koleka wana."

Nalobaki na ye: "Ezali mpenza bongo Rabi, tokataka Nzambe na biteni misato te. Ondimaka basakoli, boye te? "

Alobaki: "Iyo, Na ntembe te."

"Yo ondimi Yisaya 9 : 6?"

"Iyo."

"Mosakola azalaki kolobela nini?"

"Masiya."

Nalobaki: "Boyokani nini Masiya akozala na yango ná Nzambe?"

Alobaki: "Akozala Nzambe."

Nalobaki: "Ya solo." Amen.

Okoki kosála na Nzambe bato misato to biteni misato te. Okoki te koloba na Moyuda ete ezali na Tata, mpe na Mwana, mpe na Molimo Mosantu. Akoyebisa yo mbala moko esika nini likanisi yango eutaki. Bayuda bayebi ete endimeli oyo etiamaki na Likita ya Nicée. Ezali kokamwa te ete batálaka biso lokola papagano.

Tozali koloba na ntina na Nzambe oyo abongwanaka te. Bayuda mpe bandimaka yango. Kasi lingomba ebongoli Nzambe wana MOKO oyo abongwanaka te na ba-Nzambe MISATO. Kasi pole ezali kozonga na ntango na mpokwa. Boni ezali kobenda likebi mpo na komona ete bosolo oyo eye na ntango oyo Bayuda bazali kozonga na Palestina. Nzambe ná Klisto bazali MOKO. Yesu oyo azali NKOLO MPE KLISTO.

Yoane azalaki na emoniseli, mpe Yesu azalaki Emoniseli, bongo Amitalisaki Ye Moko awa kati na Likomi oyo : "NGAI NAZALI YE Oyo Azalaki, Oyo Azali, mpe Oyo Azali koya, Mozwi-Na-Nguya-nyonso. Amen. "

Soki ozangi emoniselisi, tombola miso mpe sengá yango epai na Nzambe. Yango nde lolenge bobele moko okoki kozwa yango. Emoniseli esengeli kouta na Nzambe. Eyáka soko moke te na nzela ya makoki ya bomoto, na nzela ya makoki ya nzoto, kasi Molimo nde apésaka yango. Okoki ata kokanga Makomi na motó, mpe atako ezali malamú mpenza, kasi okozwa yango bongo te. Esengeli kozala emoniseli kouta na Nzambe. Elobami kati na Liloba ete moto moko te akoki koloba ete Yesu azali Klisto bobele na nzela na Molimo Mosantu. Osengeli kozua Molimo Mosantu mpe na sima, mpe bobele na ntango yango, nde Molimo akoki kopesa yo emoniseli ete Yesu azali Klisto; Nzambe, Mopakolami.

Moto moko te ayebi makambo ya Nzambe kasi bobele Molimo na Nzambe mpe moto oyo epai na ye Molimo na Nzambe amonisi yango. Tosengeli kosenga Nzambe emoniseli koleka biloko nyonso mosusu na mokili. Bisó tondimi Biblia, tondimi solo ya nkembo oyo ezali kati na yango, kasi ezali kaka naino solo te

mpo na bato mingi mpamba te emoniseli ya Molimo ezali te. Liloba epesami bomoi te. Biblia elobi na Bakolinti ya mibale 5 : 21 ete biso tokómí boyengebene ya Nzambe na nzela ya bomoko na biso elongo na Yesu Klisto. Bososoli yango? Elobi ete TOZALI BOYENGEBENE MPENZA YA NZAMBE YE MOKO na kozaláká KATI NA KLISTO. Elobami ete Ye (Yesu) oyo Akómaki lisumu mpo na biso. Elobi te ete Akómaki mosumuki, kasi akómaki LISUMU mpo na biso mpo ete na nzela ya bomoko na biso ná Ye, biso tókoka kokóma BOYENGEBENE ya Nzambe. Soki toyambi likambo oyo (mpe tosengeli kondima yango) ete Ye akómaki mpenza LISUMU mpo na biso na ndenge azwaki esika na biso, na bongo tosengeli mpe kondima likambo oyo ete na bomoko na biso ná Ye, tokómi BOYENGEBENE MPENZA ya Nzambe. Koboya moko ezali koboya mosusu. Koyamba moto ezali koyamba mosusu. Sikawa toyebi ete Biblia elobi yango. Bokoki kowangana yango te. Kasi emoniseli na yango ezali kozanga. Ezali mpenza solo te mpo na bana na Nzambe mingi. Ezali bobele molongo moko malamau kati na Biblia. Kasi esengeli kokoma na BOMOI mpo na biso. Yango ekosenga emoniseli.

Botika naloba eloko moko awa oyo ekokamwisa mpe ekosunga bino. Ezali mpenza mpasi kozwa moyekoli oyo andimaka te ete Kondimana na Sika ekomamaki liboso na lokota ya Baela. Bayekoli na biso nyonso minene ya Biblia balobaka ete Nzambe apesá na mokili bikólo minene misato ná makabo minene misato mpo na Nsango-Malamu. Apesi biso Baela, bango bapesi lokóta oyo elobami na mokili mobimba. Apesi biso Bayuda oyo bapesi biso losambo ya solo mpe boyebi ya solo ya Nzambe na nzela ya Mobikisi. Apesi biso Baloma oyo bapesi biso bokonzi oyo ezali na bomoko ná mibeko mpe babalabala minene. Na yango tozali na losambo ya solo, lokóta mpo na kotalisa yango na bato mingi, mpe boyangeli ya mboka ná banzela mpo na kopanza yango bisika nyonso. Mpe na kotaleláká mambi ma kala, ezali komonana lokola ezali mpenza solo. Mpe lelo oyo, bato na mayele ya Baela bazali koloba ete lokota ya Baela ya ntango ya Biblia ezali mpenza malamau mpe na bosikisiki na lolenge ete soki moyekoli moko ya lokóta ya Kiela ayebi mpenza na bosikisiki mambi ma lokóta, akoki koyeba malamau makambo oyo Kondimana ya Sika ezali koteya.

Kasi yango ezali bobele makanisi te? Ezali solo bongo? Ezali bongo te ete nganga-mayele nyonso ya lokumu ya lokóta ya Kiela oyo auti na ebongiseli moko boye azali kotelemela nganga-mayele ya ebongiseli mosusu, mpe ezali bongo te ete kowelana na bango ezali likolo ya maloba oyo ekokani ya lokóta ya Kiela mpe mibeko ya mambi ma lokóta oyo ekokani? Ezali mpenza bongo. Ata kuna na Eleko ya Pelegamo, kaka liboso na Likita ya Nicée ya mobu 325, ezalaki na banganga mayele minene mibale, Arius ná Athanasius oyo bakangamaki na bitumba ya mateya likolo ya liloba moko ya lokóta ya Baela. Kowelana na bango ekomaki mpenza makasi mpe epanzanaki na mokili mobimba na lolenge ete bakomi ya mambi ma kala balobaki ete mokili ekabwanaki likolo ya eleli (mongongo ya mileli mibale na kati ya ekango moko.)

Boye soki lokóta ya Baelai ezali mpenza malamau, mpe etindami mpenza na Nzambe, mpo na nini kowelana ya boye? Solo mpenza Nzambe akanaki te ete biso nyonso toyéba lokota ya Baela. Kino lelo tozali kowelana likolo na lokóta ya Baela. Tokamata ndakisa buku oyo: "Christ's Paralyzed Church X-rayed" [Radio ya Eklesia Ebosono ya Klisto], ekomami na Dr. McCrossan. Na kati na buku yango, ye alobeli mingi makomi ya banganga mayele ya mambi ya lokóta ya Beala, mpe atalisaki mpo na litomba na ye moko ete mibeko oyo ebongwanaka te ya mambi ma lokóta ya Baela emonisi polele ete Biblia ezali koteya ete moto abatisami na Molimo Mosantu sima na ye kobotama lisusu mbala ya mibale. Azali koloba lisusu ete basi bakoki koteya mpamba te liloba oyo, kosakola, elingi koloba koteya. Kasi ye akokaki nde kondimisa bato na mayele mosusu ya lokóta ya Baela oyo bazali na makoki lokola ye? Soko moke te. Ekoki bobele kotánga bato na mayele oyo bamonaka kokesana na oyo wana mpe koyóka maloba oyo bayekolá.

Sikawa ezali kaka te ete makambo nauti koloba ezali solo, kasi tika tokende lisusu mwa liboso. Lelo oyo tozali na bato na mayele mosusu oyo balobaka ete makomi ya ebandeli oyo ekomamaki na lokasa, ekomamaki na lokóta ya Arameye, oyo ezalaki lokóta ya Yesu, mpe bato ya eleko na Ye. Bango balobi ete bato bazalaki koloba mpe kokoma na lokóta ya Baela te, ndenge bato mingi bakanisaka. Mpe likambo ezali ete bakomi mambi ma kala na biso bakabwani mpe na ntina na yango. Ndakisa, Dr. Schonfield, moyekoli ya mayele koleka, sima na ye kolukaluka akomaki na kotalisa ete Kondimana na Sika ekomamaki na lokóta ya Baela ndenge ezalaki kolobama na bato ya eleko wana. Atalisi mpenza malamau lolenge na ye ya komona na moboko ya mikanda ndenge na ndenge oyo azali na yango. Nzokande tozali na moto ya mayele mosusu, Dr. Lamsa, oyo andimi mpenza ete Kondimana na Sika ekomamaki na lokóta ya Arameye; mpe azali na moto mosusu te kasi moto ya mambi ma kala monene, Toynbee, oyo azali kolóngisa ye na ndenge alobi ete Arameye ezalaki lokóta oyo bato nyonso bazalaki koloba , kasi lokóta ya Baela te, na bongo ezali komonana lokola ete Kondimana na Sika ekomamaki liboso na Arameye.

Kasi, liboso na biso komitungisa mpo na yango, tika totanga libongoli ya Roi Jacques ná libongoli ya Dr. Lamsa. Mpo na esengo na biso, tomoni ete kati na bandimbola nyonso mibale maloba ezali mpenza ndenge moko, na lolenge ete bokeseni ezali te kati na yango to na malakisi na yango. Tokoki kutu koloba ete Nzambe atikaki ete makomi ya kala oyo bauti komona mikolo oyo ná makomi oyo eyebani kasi bauti kobimisa yango sika, ekómela biso mpo na kotalisa polele bosolo ya oyo biso tozalaki na yango. Bongo biso tomoni ete ata soki babóngoli bazali kowelana kati na bango, makomi ya kala ewelanaka te.

Sikawa bokoki komona ete bokoki te kotya ndimbola likolo na boyebi malamumu ya bato na mayele, ya lokóta oyo Biblia ekomami kati na yango. Kasi soki bokoki kaka komona yango te mpo ete mimesano ezipi makanisi na bino, botala ndakisa oyo ya suka. Na ntembe te Bakomi, Bafalisai mpe bato ya mayele mingi ya mobu 33 ya eleko na biso, bayebaki na bosikisiki mibeko ya mambi ma lokóta mpe ndimbola ya solosolo ya maloba oyo Kondimana ya Kala ekomamaki kati na yango; kasi, ata boyebi na bango nyonso ya bozindo, bazangaki emoniseli ya Liloba ya elaka ya Nzambe oyo emonisamaki kati na Mwana. Ye atalisamaki wana kobanda na Genese kino na Malaki, ná mikapo nyonso oyo ezali kolobela Ye ná mosala na Ye, nzokande, libanda na bato moke oyo bazwaki pole na nzela na Molimo, bango bazangaki Ye mobimba.

Tokoki sikawa koloba boye, ndenge tosili komona kati na Liloba. Atako ezali malamumu koluka kozua makomi ya kala mpe ya malamumu koleka, kozua nkoma ya Liloba ya malamumu koleka, tokoyeba ndimbola na yango ya solo ata moke te na nzela ya boyekoli mpe kokokanisa Makomi, ata soki tozali mpenza sembo. EKOSENGA EMONISELI KOUTA NA NZAMBE MPO NA KOTALISA YANGO POLELE. EZALI MPENZA LIKAMBO POLO ALOBAKI : "MPE BISO TOZALI KOLOBELA YANGO, NA MALOBA YA BWANYA YA BOMOTO TE KASI NA MALOBA OYO MOLIMO MOSANTU AZALI KOLAKISA." Bakolinti ya liboso; 2:15 Emoniseli ya solo ezali nde Nzambe kolimboláká Liloba na Ye moko na kokokisáká makambo oyo elakamaki.

Sikawa, moto moko te asósola mabe makambo oyo nauti koloba mpe akanisa ete ngai nandimaka bosikisiki ya Liloba te ndenge tozali na yango lelo. Ngai nandimaka ete Biblia ezali solo. Yesu atalisaki mpenza bosolo ya Kondimana na Kala ntango azalaki awa na mokili, mpe yango esangisamaki kaka lokola Kondimana ya Sika oyo tozali na yango. Kosala libunga ata moke te mpo na yango, tozali na Liloba na Nzambe oyo ekweyaka te lelo, mpe moto moko te ámeke kolongola to kobakisa likolo na yango. Kasi tozali na bosenga ya Molimo moko wana oyo Apesaki yango, mpo na koteya biso yango.

Ô, boni tosengeli na emoniseli kouta ná Molimo. Tosengeli na Biblia ya sika te, tosengeli na ndimbola ya sika te, atako misusu ezali malamumu mingio, mpe ngai natelemeli yango te, KASI TOSENGELI NA EMONISELI YA MOLIMO. Mpe totondi Nzambe, tokoki kozua oyo tosengeli na yango, mpamba te Nzambe alingi komonisa biso Liloba na Ye na nzela ya Molimo na Ye.

Tika ete Nzambe, na Molimo na Ye, ábanda kopesa biso emoniseli oyo ezali kokoba kopesa bomoi mpe ya elongá. Ô, soki bobele Lingomba ekokaki kozua emoniseli ya sika mpe kokóma na nzela na yango Liloba ya bomoi oyo emonisami polele, tolingaki kosala misala minene koleka mpe kokumisa Nzambe, Tata na biso na Lola.

### **TOKANGOLAMI NA MASUMU**

Emoniseli 1: 5,

"Epai na Ye oyo alingaki biso mpe asukoli biso na masumu na biso na nzela na makila na Ye. "

Liloba oyo "kosukola" elingi mpenza koloba, "kokangola" — "Akanboli biso na masumu na biso kati na makila na Ye moko. " Ezali kitoko mingi, boye te? Kasi bino bozali bato ya molimo? Bososoli yango? Ezalaki makila na Ye MOKO nde ekangolaki biso mobimba na masumu na biso. Ezalaki makila ya moto te. Ezalaki makila na Nzambe. Petelo abengaki yango makila ya Klisto. Polo abengaki yango makila ya Nkolo, mpe makila ya Yesu. Bato misato te, kasi moto MOKO. Botala emoniseli yango lisusu, Nzambe MOKO. Yehova Nzambe na nguya wana akitaki mpe Amisalelaki nzoto na nzela ya mbotama na moseka, mpe Afandaki kati na yango mpo ete ákoka kozala makila ya Nzambe oyo elingaki kosikola biso (kokangola biso mobimba) na masumu na biso, mpe kotalisa biso tozangi litono, liboso na Ye moko kati na esengo mingi koleka.

Bino bokolinga etáliseli ya Kondimana na Kala? Tika tozonga na Elanga ya Edene. Ntango nsango ya liboso ekómaki na nkembo ete mwana, Adama, abungaki, Nzambe atindaki mwanje? Atindaki mwana mobali? Atindaki moto mosusu lokola biso? Te, Ayaki YE MOKO mpo na kosikola mwana yango oyo abungaki. Aleluya! Nzambe apesaki mwango na Ye ya lobiko epai na moto mosusu te. Atiaki motema bobele na Ye moko. Nzambe akómaki mosuni mpe afandaki elongo na biso mpe Asikolaki biso mpo na Ye moko. Tobikisámi na makila ya "Nzambe ". Nzambe ya Seko afandaki kati na nzoto ya kufa mpo na kolongola masumu. Akómaki Mwana na mpate, mpo kosopa makila na Ye mpe kokota kati na ezipelo ná yango.

Botala likambo oyo. Lokola ezali makila ya Nzambe, yango ezali makila oyo ebongi be; bongo soki makila oyo ebongi be ezali kokangola biso na nguya mpe boómbo mpe na mbindo ya masumu, na boye kokangolama yango ebongi be mpe ezali mobimba. Na yango sikawa kokweisama ezali te.

"Nani akofunda baponami na Nzambe,? Ezali Nzambe nde akomisaka sembo (Azali koloba ete biso tozali bayengebene). Nani akokweisa bango? Ezali Klisto nde akufaki ... "

Baloma 8: 33-34.

Bomoni yango; liwa na Ye epesi biso makila. Makila ekangoli biso. Sikawa, etumbu ezali te. Ndenge nini ekoki kozala? Eloko ya kokatela etumbu ezali te, mpamba te makila ekangoli biso na masumu. Tozali nsomii, tozangi ekwélo. Boyóka moto te, boyoka Liloba. Bokangolami na makila.

Sikawa bokangama lisusu te na mimesano, na bindimeli mpe na bibongiseli. Bópengwisama te na koyokáká baoyo bazali koboya nguya ya Liloba mpe bazali kondima te ete Yesu azali Mobikisi, Abikisaka na bokono, Atondisaka na Molimo Mosantu mpe na nguya. Bozali bato na bonsomi ya Nzambe, bokangolami na makila na Ye moko. Soki kondima na yo etiami kaka likolo na bindimeli mpe bibongiseli, wana ezali solo kotalisa polele ete osili kobungisa kondima na yo kati na Liloba.

### **BAKONZI MPE BANGANGA-NZAMBE**

Emoniseli 1: 6,

“Mpe Ye oyo akomisi biso ekólo ya bakonzi mpe ya banganga-nzambe mpo na Nzambe, Tata na Ye; Tika ete nkembo mpe nguya ezonga epai na Ye mpo na libela na libela! Amen.”

“Akomisi biso!” Ô, ezali na ba-solo mosusu oyo tosengeli kobenda likebi mingi likolo na yango. Oyo ezali moko na yango. YE! AKÓMISI BISO! Lobiko ezali mosala na Ye. Lobiko ezali kouta na Nkolo. Ngolu nyonso. Ye asikoli biso mpo na ntina moko. Asombaki biso mpo na ntina moko. Tozali bakonzi, bakonzi ya molimo. Ô, tokozala bakonzi na mokili elongo na Ye ntango Akofanda na ngwende na Ye. Kasi sikawa tozali bakonzi ya molimo mpe tozali kokonza likolo ya bokonzi ya molimo.

Elobami na Baloma 5: 17,

“Mpamba te soki na nzela ya mabe ya moto moko, kufa ezwaki bokonzi likolo ya moto wana se moko, ndenge nini bato oyo bayambi litondi ya ngolu mpe likabo ya boyengebene bázala na bokonzi te kati na bomoi na nzela ya Yesu Klisto Ye moko!”

Mpe kati na Bakolose 1:13,

“Akangolaki biso na nguya na molili mpe amemaki biso kati na bokonzi ( boyangeli) ya Mwana na Ye molingami.”

Tozali sikawa kokonza elongo na Klisto, tozali na bokonzi likolo na lisumu, mokili, mosuni, mpe zabolo. Kotalisáká masanzoli mpe nkembo na Ye; kotalisáká YE MOKO, mpo ezali Klisto kati na biso nde Azali komonisa kolinga mpe kosala engebene na bolingi na Ye. Ya solo mpenza, kutu ata sikawa, tofandi na bisika ya likoló kati na Klisto Yesu.

“Mpe akómisi biso banganga-nzambe.” Iyo, banganga-nzambe epai na Ye, kopesáká mbeka ya masanjoli ya molimo kouta na bibebu bibulisami. Kobikáká bomoi na biso lokola mbeka ya kitoko epai na Ye. Kokumisáká Ye na Molimo mpe na solo. Kolobeláká mpe kobondeláká. Banganga-nzambe mpe bakonzi epai na Nzambe na biso. Yango wana mokili ezali kobenda biso te, mpe biso tozali bato ya ndenge mosusu, ná mpila mpo na misala malamau. Tosili kokelama lisusu kati na Ye mpo ete tózala bana bo Tata na biso.

### **NZAMBE OYO AZALI KOYA**

Emoniseli 1: 7,

“Tala, azali koya na mapata; mpe miso nyonso ekomona Ye, ezala bato oyo batobolaki Ye; mpe bikólo nyonso ya mokili ekomilela na ntina na Ye. Ekosalema bongo! Amen.”

Azali koya. Yesu azali koya. Nzambe azali koya. Mosakoli azali koya. Nganga-nzambe mpe Mokonzi azali koya. NYONSO kati na NYONSO azali koya. Ata bongo, Nkolo Yesu, yaka nokinoki. Amen.

Azali koya. Azali koya na mapata, mapata ya nkembo lokola ntango Amonanaki likolo na Ngomba ya bobongwani, mpe bilamba na Ye bizalaki kongenga wana nguya ya Nzambe, ezingaki Ye. Mpe liso NYONSO ekomóna Ye. Yango elingi koloba ete ezali Konetolama te. Oyo ezali ntango Akoya kokamata esika na Ye mpenza lokola Moyangeli ya Mokili. Ezali na ntango yango nde baoyo batobolaki Ye na bindimeli mpe na malakisi ya bibongiseli na bango bakolela, mpe bato nyonso bakomilela na kobanga na ntina na Ye Oyo azali Liloba.

Oyo ezali oyo emoniseli ya Zakalia 12: 9-14 elobi. Zakalia asakolaki yango eleki pene na mibu 2500. Etikali moke mpenza esalema. Boyoka.

“Mpe ekosalema ete na mokolo wana, nakobima mpo na koboma bikólo nyonso oyo ekoya kobundisa Yelusaleme.

Mpe Nakosopa Molimo ya ngolu mpe ya mabondeli likolo na libota ya Dawidi mpe likolo na bavandi ya Yelusaleme, mpe bakobalola miso epai na Ngai oyo batobolaki ...”

Sikawa, ntango nini Nsango-Malamu ekozonga epai na Bayuda? Ntango eleko ya bato na Mabota ekosila. Nsango-Malamu ebelemi mpo na kozonga epai na Bayuda. Ó, soki bobele nakokaki koyebisa bino likambo moko oyo elingi kosalema sikawa na mikolo oyo tozali kobika. Eloko ya nkembo oyo elingi kosalema ekoleka na Emoniseli 11, mpe ekozua batatoli wana mibale, basakoli wana mibale, Mose ná Eliya, mpo na kozongisa Nsango Malamu epai na Bayuda. Tobelemi mpo na yango. Biloko nyonso ezali na molongo. Ndenge Bayuda bamemaki nsango epai na bato ya Mabota, bato ya Mabota mpe bakozongisa yango epai na Bayuda, bongo Konetolama ekosalema.

Sikawa, bokanisa lisusu oyo totangaki na Emoniseli mpe na Zakalia. Makambo mibale wana ekosalema kaka na nsima ya minioko. Lingomba ya Babotami ya Yambo ekoleka na minioko te. Toyebi yango. Biblia ezali koteya yango.

Na ntango yango elobami ete Nzambe akosopa Molimo na Ye likolo na ndako na Yisalaele. Ezali Molimo yango moko oyo esopanaki likolo na Bapagano na mikolo na bango. "Mpe bakobalola miso na bango epai na Ngai oyo batobolaki, mpe bakolela mpo na Ye, lokola balelaka mwana oyo abotama kaka ye moko, bakoyoka mawa mingi ndenge bayokaka soki mwana mobali ya liboso akufi. Na mokolo yango, matanga monene ekozala na Yelusaleme, lokola matanga ya Adadi-Rimoni na lobwaku ya megido. Mboka mobimba ekosála matanga, libota na libota na esika na yango : libota na Dawidi epai mpe basi na bango epai; libota ya Natan epai mpe basi na bango epai; ..." mpe ndako moko moko epai ntango Akoya na mapata ya nkembo na Boyei na Ye ya Mibale. Bayuda wana oyo batobolaki Ye bakomona Ye, ndenge elobami na Likomi mosusu: "Esika nini Ozwaki ba-mpota oyo?" Bongo Ye akoloba: "Na ndako ya baninga na Ngai." Ekozala kaka te ntango ya matanga mpo na Bayuda oyo baboyaki Ye lokola Masiya, kasi ekozala mpe ntango ya matanga mpo na bato ya Mabota oyo bakotikala, baoyo baboyaki Ye lokola Mobikisi ya eleko oyo.

Ekozala na kolela mpe komilela. Baseka ya bozoba bakomilela. Bazali kotalisa lingomba oyo eboyaki kozua mafuta ( etaliseli ya Molimo Mosantu) kati na minda na bango (etaliseli ya nzoto to mbeki ya mafuta) kino ntango elekaki. Yango elingi koloba te ete bazalaki bato mabe. Bazalaki baseka, yango elingi koloba ete bazalaki na bizaleli malamumpenza. Kasi bazalaki na mafuta na minda na bango te, na yango babwakamaki libanda na esika ya komilela mpe kokatakata na mino.

Tika tokokanisa yango na buku ya Ebandeli, mokapo ya 45, esika Yosefu azali kokutana na bandeko na ye na Ezipito mpe komimonisa epai na bango. Ebandeli 45:1-7 : "Yosefu akokaki lisusu kokanga motema te liboso ya bato nyonso oyo bazalaki wana, agangaki : Bobimisa bato nyonso. Boye moto moko te azalaki pembeni na ye, ntango Yosefu amimonisaki epai ya bandeko na ye ya mibali. Atombolaki mongongo mpe alelaki maksi; Baezipito bayokaki ye mpe ndako na Falo eyokaki ye. Mpe Yosefu alobaki na bandeko na ye : nazali Yosefu! Tata na ngai azali naino na bomoi? Kasi bandeko na ye bakokaki koyanola ye te; mpamba te bazalaki kolenga liboso na ye. Yosefu alobaki na bandeko na ye : Bopusana pembeni na ngai! Mpe bango bapusanaki. Mpe ye alobaki : Nazali Yosefu, ndeko na bino, oyo botekaki mpo ete bámemama ngai na Ezipito. Kasi sikawa, bomitungisa te mpe bózála na mawa te na ndenge botekaki ngai awa; Nzambe nde atindaki ngai awa liboso na bino mpo na kobatela bomoi. Zambi eleki mibu mibale oyo nzala makasi ezali kati na mokili: nzokande etikali lisusu mibu mitano oyo bakolona te mpe bakobuka te. Nzambe atindaki ngai liboso na bino mpo na kobatela bino mpe bana na bino na mokili, mpe mpo na kobikisa bomoi na bino na nzela ya kosikolama monene. "

Sikawa, makomi oyo, ezali kokokanisa malamumpenza na Zakalia 12 te? Soki tosangisi yango mibale, tokokóma na komona yango malamumpenza.

Ntango Yosefu azalaki elenge mobali, ayinamáki na bandeko na ye. Mpo na nini bandeko na ye bazalaki koyina ye? Ezalaki mpo ete ye azalaki moto ya Molimo. Akokaki komipekisa te komona bimononeli, akokaki mpe te komipekisa kolota bandoto mpe kolimbola yango. Ezalaki kati na ye. Akokaki kotalisa eloko mosusu te kasi oyo ezalaki kati na ye. Yango wana, bandeko na ye bazaki koyina ye bobele mpamba. Kasi alingamaki na tata na ye. Tata na ye azalaki mosakoli mpe azalaki kososola. Yango epesi biso elilingi oyo ebongi be ya Klisto. Nzambe Tata alingaki Mwana, kasi bandeko (Bakomi ná Bafalisai) bazalaki koyina Ye mpo Akokaki kobikisa babeli, kosála bikamwa mpe kosakola makambo mazali koya, komona bimononeli mpe kolimbola yango. Ntina ya koyina Ye ezalaki te, kasi bango bayinaki Ye, mpe, lokola bandeko ya Yosefu, bayinaki Ye kozanga ntina.

Sikawa, bomikanisela ndenge bana ya Yakobo bazalaki kosala Yosefu. Babwakaki ye na libulu. Bazuaki kazaka na ye ya balangi mingi oyo tata na ye apésaki ye mpe bazindisaki yango kati na makila mpo na kosala ete tata na ye ákanisa ete elenge mobali abomamáki na nyama. Bango batekaki ye epai ya bateki baombo mpe amemamaki na Ezipito; mpe kuna atekamaki lisusu epai ya mokonzi ya basoda. Mwasi ya mokonzi ya basoda akoselaki ye makambo bongo bakangaki ye, kasi sima na ntango moke makoki na ye lokola mosakoli ebendaki bokebi ya Falo, mpe atombwamaki na loboko ya mobali ya Falo ná bokonzi na lolenge ete moto moko te akokaki kokende liboso na Falo bobele ete áleka liboso epai na Yosefu.

Sikawa totala malamumpenza bomoi ya Yosefu wana azalaki na Ezipito, mpo ezali kuna nde tomoni ye lokola



elilingi oyo ebongi be ya Klisto. Wana ezalaki ye na ndako ya mokonzi ya basoda, bakoselaki ye makambo, bapesaki ye etumbu mpe babwakaki ye na boloko kaka mpamba, bobele ndenge basalaki na Yesu. Kuna na boloko, alimbolaki ndoto ya mopesi-masanga ná ya mosali-mampa ya Falo oyo bazalaki bakangami elongo na ye. Mopesi-masanga azongisamaki na bomoi, kasi oyo mosusu apesamaki etumbu ya liwa. Klisto Akangamaki na ekulusu, asundolamaki na Nzambe mpe na bato. Na ngambo na ye nyonso mibale ezalaki na moyibi moko— moko azkufaki, na molimo, kasi oyo mosusu apesamaki bomoi. Mpe botala malamumu ete ntango Yesu alongolamaki na ekulusu, Amemamaki na likolo bongo sikawa Afandi na loboko ya mobali ya Molimo monene na Yawe; mpe moto moko te akoki koya epai na Nzambe, soko na nzela na Ye te. Molobeli azali MOKO kati na Nzambe mpe bato, mpe Ye nde nyonso osengeli na yango. Malia to basantu bazali te, bobele Yesu.

Tokoba kotala elilingi oyo tomoni kati na Yosefu; botala ndenge makambo nyonso asalaki na Ezipito efulukaki. Mosala na ye ya liboso epai na mokonzi ya basoda efulukaki. Ata boloko mpe epambolamaki. Ntango Yesu akozonga, esobe ekotonda na fololo. Ye azali "Mwana ya Bozwi." Lokola eleko ata moko te ezalá na bozwi lokola eleko oyo ezalaki na nse ya bokambami ya Yosefu, ndenge moko mpe eleko ya mapamboli oyo mokili etikalá koyeba te ekoya. Moto nyonso akokoka kofanda na nse ya nzete na mosuke na ye moko mpe koseka, kosepela mpe kobika mpo na libela liboso na Ye. Liboso na Ye ezali na litondi ya esengo, mpe na loboko na Ye ya mobali, bisengo ezali mpo na libela na libela. Nzambe asanzolama.

Sikawa botala, esika nyonso Yosefu azalaki kokende, bazalaki kobeta kelelo mpo na kosakola boyei na ye. Bato bazalaki koganga: "Bogumbamela Yosefu!" Ata soki moto azalaki kosala nini, ntango babeti kelelo, azalaki kogumbama. Ekoki kozala ete azalaki koteka eloko moko na balabala, asembolaki loboko mpo na kokamata mosolo na ye, kasi asengelaki kotika mpe kogumba mabolongo ntango babeti kelelo. Soki azalaki ata mobeti miziki to mosani, asengelaki kotika masano mpe kogumba mabolongo liboso na Yosefu, ntango bazalaki kosakola boyei na ye na kobetáká kelelo. Bongo moko na mikolo oyo, nyonso oyo ezali kati na ntango ekotelema, wana kelelo ya Nzambe ekoyula, mpe bakufi kati na Klisto bakosekwa, mpe ntango ya seko na seko ekotana, na kongenga mpe kitoko. Na ntango yango, nyonso ekogumbama, mpo ekomami ete :

"Yango wana mpe Nzambe atomboli Ye likolo mpenza, mpe apesi Ye Nkombo oyo eleki bankombo nyonso;

mpe ete na Nkombo na Yesu, mabolongo nyonso efukama, na likolo, na mokili, mpe na nse ya mokili; mpe minoko nyonso etatola ete Yesu Klisto azali Nkolo mpo na nkembo ya Nzambe Tata ".

Bafilipi 2: 9-11.

Kasi botala emoniseli mosusu ya nkembo na elilingi oyo ya Yosefu. Yosefu, wana azalaki na Ezipito, bapesaki ye mwasi ya Mabota mpe na nzela na ye abotaki bana mibali mibale, Efalaima ná Manase. Yosefu asengaki tata na ye ete apambola bana wana mibale. Atiaki bango liboso na Yakobo na lolenge ete Manase, mobotami ya yambo, ázala na loboko ya Yakobo ya mobali bongo Efalaima ázala na loboko ya mwasi. Ntango Yakobo alingaki kopambola bango, akutanisaki maboko na ye na lolenge ete loboko na ye ya mobali etyamaki likolo na leki. Yosefu agangaki: "Boye te, tata, oyo nde mobotami ya yambo, na ngambo na yo ya mobali." Kasi Yakobo alobaki: "Nzambe akutanisi maboko na ngai." Awa tozali komona na elilingi ete lipamboli oyo ezalaki ya mobotami ya yambo (Bayuda) epesamaki epai na leki (Bato na Mabota) na nzela ya ekulusu (maboko oyo ekutanaki na ekulusu) ya Nkolo Yesu Klisto. Lipamboli eyaka na nzela ya ekulusu. Bagalatia 3: 13-14 : "Klisto asikolaki biso na bilakeli mabe ya mobeko, Ye akomaki elakeli mabe na esika na biso; mpamba te ekomami ete : Alakelama mabe moto nyonso oyo abakami na nzete; na ntina ete kati na Yesu Klisto, bapagano bazwa mapamboli ya Abalayama, mpe mpo ete biso tozwa, na nzela ya kondima, Molimo oyo Nzambe alakaki." Mapamboli ya Abalayama eyaki epai na Mabota na nzela ya ekulusu. Bayuda babwakaki ekulusu; yango wana, Yesu azuaki mwasi na libala ya Mabota.

Sikawa tozonga na lisolo ya Yosefu ntango akutani na bandeko na ye. Bokanisa lisusu ete bandeko nyonso bayaki te. Yosefu ayebaki yango mpe atiaki mbamba ete bandeko nyonso baya liboso na ye, to akokaki komitalisa epai na bango te. Sukasuka bamemaki ndeko oyo azangaki, Benyamina moke. Ezalaki Benyamina moke, ndeko ya Yosefu ya tata mpe mama moko, nde apelisaki motema na ye. Mpe ntango Yosefu na biso, ye Yesu, akoya epai na bato oyo babateli mibeko na Nzambe mpe bazóngi na Palestine, molimo na Ye ekopela móto. Benyamina moke azali elilingi ya ba-Yisalaele 144.000 oyo bauti na mokili mobimba, mpe basili kozonga na Palestine mpo na lisiko na bango. Bakozala wana babelemi mpo na koyamba Ye, Ye oyo, koyeba Ye malamumu ezali Bomoi na Seko. Bakoloba: "Oyo azali Nzambe na biso oyo tozalaki kozela." Bongo bakomona Ye oyo batobolaki. Mpe bakoganga na kobanga : "Bampota oyo ya nsomo euti wapi? Ndenge nini esalemaki? " Bongo bakomilela mpe bakolela, libota moko na moko esika na yango, moto moko na moko na esika na ye, kati na mpasi mpe mawa.

Bongo Lingomba ya Mabota ekozala wapi ntango Yesu azali komimonisa epai na bandeko na Ye? Bomikundola ete mwasi ya Yosefu elongo na bana mibale bazalaki na ndako ya mokonzi, mpo Yosefu apesaki motindo : "Bato nyonso balongwa liboso na ngai; bolongola bango nyonso liboso na ngai." Na

bongo, mwasi na libala ya Mabota abombamaki na kati ya ndako ya Yosefu. Lingomba ya Mabota ekokende wapi na konetolama? Na ndako ya Mokonzi. Mwasi na libala akolongolama na mokili. Akonétolama liboso na bolózi monene mpo na kokutana na Nkolo na ye na mipepe. Mpo na mibu misato na ndambo, ntango nkanda na Nzambe ekosopana, ye akozala kati na Elambo monene ya Libala ya Mwana na Mpate. Na nsima Akozonga mpo na komimonisa epai na bandeko na ye, wana atiki Mwasi na Ye ya libala na "Ndako ya Tata na Ye". Na ntango yango mpenza, boyokani oyo ezali kotelemela Klisto, oyo Bayuda basalaki ná Roma, ekokatana. Roma ná basangani na ye baktotinda na ntango wana basoda na bango mpo na koboma Bayuda nyonso oyo bazali kobanga Nzambe mpe kobatela Liloba.

Kasi wana bakobelega mpo na kobebisa engumba, elembo ya boyei ya Mwana na Moto elongo na mapinga na Ye ya nguya ekomonana na likolo, mpo na koboma baoyo bazali kobebisa mokili. Wana bapusi monguna mosika, Yesu akoya mpe Akomitalisa epai na ba144.000. Lokola bamonaki misala na Ye ya nguya ya lobiko, bakoyeba nguya na Ye. Kasi ntango bakomóna bampota na Ye mpe lokola bayebaki ete babwakaki Ye kino na ntango wana, esalaki ete bango balela na mpasi, na kolenga mpe kobanga, kaka lokola bandeko na bango ya kala ntango batelemaki liboso na Yosefu, bazalaki na kobanga makasi ete babomama. Kasi lokola Yosefu alobaki: "Bobanga te. Nyonso ezali malamumu. Nzambe azalaki kati na makambo nyonso wana. Asalaki yango mpo na kobatela bomoi." Ezali mpe bongo nde Yesu akotalisa kimia mpe bolingo epai na bango.

Mpo na nini Bayuda baboyaki Yesu? Nzambe azalaki kati na nyonso wana. Ezalaki bobele na nzela wana nde Akokaki kobimisa Mwasi na libala ya Mabota. Akufaki na ekululu mpo na kobatela bomoi ya Lingomba ya Mabota.

Sikawa, ba 144.000 bazali mwasi na libala te. Na Emoniseli 14: 4 babengami baseka mpe bazali kolanda Mwana na mpate esika nyonso azali kokende. Likambo oyo ete bango bamiyesi mbindo ná basi te, ezali kotalisa ete bazali mikube (Matai 19: 12.) Mikube bazalaki babateli ya bankuku ya babalani. Bazalaki basali. Botala ete bango bafandi na ngwende te, kasi bazali liboso na ngwende. Te, bazali kati na Mwasi na libala te, kasi bakozala kati na bokonzi ya nkembo ya mbula nkoto.

Na sima, tozali komona ete ntango etika oyo ya Yisalaele ekosangana na kati ya bolingo ná Nkolo, mpe monguna akosila kobomama, Nzambe Akobongisa ngomba na Ye ya bulee, Elanga na Ye ya sika ya Edene mpo na Mwasi na Ye mpe mpo na basali ya Mwasi mpe ya Mobali na libala, mpo na mibu nkoto ya bopemi sima na libala na mokili. Ndenge Adama ná Ewa bazalaki kati na elanga mpe bakokisaki mibu nkoto te, sikawa Yesu, Adama na biso ya suka, ná Ewa na Ye (Lingomba ya solosolo) bakokokisa mwango nyonso ya Nzambe.

Ô, boni Biblia ezali komizongela yango moko. Etikali moke elilingi ya Yosefu ná bandeko na ye esálema lisusu, mpamba te na mwa ntango moke, Yesu azali koya.

Mpe lwana tozali kotika elilingi ya Yosefu, eloko mosusu ezali oyo nalingaki kobenda bokebi na bino na ntina na ntango oyo ya suka. Boyebi lisusu ete wana Yosefu atelemaki liboso na bandeko na ye ntango Benyamina azalaki elongo na bango te, azalaki koloba na bango na nzela ya molimboli, atako ayebaki Liébele malamumu. Asololaki na bandeko na ye na lokóta mosusu. Bino boyebi ete Eleko ya Mabota oyo ya liboso (motó ya wolo, Eleko ya Babilone) esilaki ná nsango moko na monoko oyo eyebani te likolo na etutu? Eleko oyo ezali kosila na lolenge moko wana. Kofuluka ya ba-nkótá na mikolo oyo ezali elembeteli mosusu oyo ezali kotalisa ete Ntango ya Mabota esili mpe Nzambe azali kozongela Yisalaele.

Azali koya na mwa ntango moke. Alifa ná Omega, Mosakoli, Nganga-Nzambe mpe Mokonzi, Nyonso kati na Nyonso, Nkolo Nzambe na Bibebe, Azali koya mosika te. Atako bongo Nkolo Yesu, Nzambe Bobele Moko ya Solo, yaka noki!



[www.messagehub.info](http://www.messagehub.info)

Mateya eteyami na

**William Marrion Branham**

"... Na mikolo ya mongongo..." Emoniseli 10:7